

الإنس والجيس



عنوان الكتاب : الإنس والجبس
الكاتب: أحمد عاطف

تصحيح لغوى : سوزان عبد الغنى

تصميم الغلاف : مختار زين

إخراج فنى : سكون

رقم الإيداع : ٢٥٨٦٢ / ٢٠١٨

ردمك : 978-977-6549-87-6

الطبعة الأولى : ديسمبر ٢٠١٨



رئيس مجلس الإدارة: شريف الليثي



دار تويآ للنشر والتوزيع



dartoya2015@gmail.com



Dar.toya دار تويآ للنشر و التوزيع



@Dar_Toya



Dar.toya



(+2) 01202222098



٣٥ شارع النصر - الهادي - القاهرة - مصر

جميع حقوق الطبع والنشر محفوظة للدار

أحمد عاطف

الإنس والجيس



هذا العمل اهداء الى روح الدكتور محمد القرنفلى مدير
المستشفى

«هو لسة مماتش .. بس ان شاء الله»

بسم الله الرحمن الرحيم

بداية جديدة على النيل

الكتاب دا هو بداية لمغامرة جديدة في مستشفى جديدة بعد ما خلصت مغامراتي في الوحدة الصحية اللي كنت فيها في إحدى قرى محافظة الغربية، مغامراتي اللي دونتها في كتابي الأول «بالطو وفانلة وتاب».. لو قرينه أكيد هتبقى عارف المرمطة اللي أنا اتمرمطتها كويس، ولو مقرتهوش فخلي حد قراه يحكيك عن المرمطة اللي أنا اتمرمطتها أو ما يحكيش هو مش فارق عمتاً، لأن دي رحلة جديدة كليا ملهاش أي علاقة بالكتاب الأول.

المهم بعد المرمطة في شغل الوحدة الصحية بكفر الحاج هيثم لمدة سنتين (مدة فترة التكليف) جه الوقت أخيراً إني ابدأ مرحلة جديدة في حياتي الطبية وهي مرحلة «النيابة» اللي هي مرحلة التخصص، يعني هنتقل من مرحلة طبيب التكليف بتاع الوحدة الصحية اللي بيعالج كل حاجة إلى مرحلة الطبيب المتخصص في

حاجة واحدة بس، وأنا اخترت تخصص «العظام» عشان يكون هو الحاجة الواحدة دي.

كبت رغباتي في موقع التقديم بتاع الوزارة، وللأسف كتبتها عمياني من غير ما أعرف المستشفيات ولا أسأل عليها، ف جتلي مستشفى في إسكندرية بعيدة وطريقها وحش ومفيهاش شغل خالص، يعنى مش هتعلم أي حاجة، عشان كذا قبل ما استلم فيها قولت لا أنا هعمل حاجة اسمها «تعديل جهة نيابة» ودا أوبشن متاح ليك مرة واحدة فقط خلال أول سنة في النيابة، لذلك كنت حريص جداً قبل ما أكتب اسم المستشفى الجديدة في الأوبشن دا، لأنني بمجرد ما هكتبه مش هينفع أغير تاني المستشفى قبل مرور سنة، يعني هلبسها لمدة سنة كاملة متكاملة لو طلعت وحشة، عشان كذا قولت المرة دي بقى لازم أروح أشوف المستشفى اللي هكتبها على الواقع قبل ما أعمل أي حاجة عشان متدبشش.

المهم حددت لنفسي مستشفيين في القاهرة اختار ما بينهم واحدة، وروحتهم الأثنين عشان اختار واحدة منهم اكتبها في طلب تعديل جهة النيابة، والمستشفيين كانو حلوان العام ومستشفى الملك الصالح، رocht حلوان العام لقيتها فيها دكاترة ومرضى وزحمة يعنى عادي زيها زي أي مستشفى حكومية شغالة، وبعدين رocht لمستشفى الملك الصالح، ودي لما سألت عليها قالولي إنها دقيقتين من المنيل، وأنا اللي أعرفه إن المنيل دي منطقة حلوة جداً وراقية، عشان كذا اتفائلت بالمستشفى، بس عمرى ما كنت أتوقع

إني لما أروحها هلاقيها بتطل على النيل مباشرة والباب بتاعها قدامه الكورنيش!

الله .. دي بينها هتلعب يا واديا أحمد وهتنسى أيام كفر الحاج هيثم والترعة اللي مليانة طحالب وقراميط قدام الوحدة الصحية، واللي هيدخل يكشف عندي هيبقى من نوعية الناس اللي بتدخل لابسة نضارة شمس وساحة في إيديها كلب أبيض صغير بفرو لابس نضارة شمس هو كان، ولا اقولكو، أبطل نق ونبر، عشان أنا كل ما أقول دي بينها هتلعب ما بتلعبش ... أنا هصبر ... لما أدخل المستشفى أتأكد.

دخلت من باب المستشفى وبصيت ورايا في الخبائة كدا (عشان أتأكد إن النيل لسة موجود قدامها ولا لأ.. عشان عارف أنا الحركات دي)... ودخلت جوه المستشفى لقيتها لسة متجددة من سنة وحلوة جداً شكلها يفتح النفس، فقولت لسة متجددة وقدامها النيل، طب والله العظيم لكاتبها طبعاً في تعديل جهة النيابة، أنا هعوز إيه أكثر من كدا .

وخرجت بقى بسرعة عشان أروح الوزارة أخلص ورق التعديل دا واستلم في مستشفى الملك الصالح، وأنا طول الطريق للوزارة عمال أتخيل إن الأستاذة ياسمين صبري ساحة الكلب بينك بتاعها وبتتمشى على الكورنيش وفجأة الكلب يجري شوية فيشدها فتتكفي على بوزها تقع إيدها تتكسر ف تيجي تكشف عندي.

خلصت بقى الورق والروتين في كام يوم كدا وخذته وروحت
المستشفى دى بقى عشان استلم، ودخلت من باب المستشفى بكل
فخر وانشكاح، اللي هو أخيرا اشتغلت في مكان ع النيل يا بلد،
ودخلت جوه المستشفى خلصت ورق استلامي وروحت لرئيس قسم
العظام حطلي الجدول بتاعي وعرفت مواعيد نبطشياتي وكله تمام.

وأنا مروح بقى ومعدني على الاستقبال في طريقي للخروج
من المستشفى، لقيت واحد متشلفظ بالسيوف على جسمه ورقبته
ووشه ومعاه اتنين متشلفطين زيه بالظبط وعمال يزعق ويقول:
(فين الدكاترة ولاد ال***الي هناaaaaaaaaaaaaaaaaaaaa) لسة بحاول
استوعب إيه اللي حصل لقيت ست لابسة عباية سودا مجسمة بترتر
كتير أوي عندها حوالى ٤٠ سنة ومطلعة أوصة صفرا مصبوغة
بالأوكسوجين من الطرحة وفاتحة المراية اللي هي بتبقى في البوك
دي، وعماله تبص فيها وماشية في المستشفى بالشبشب أبو كعب
مش عارف جاية منين ولا رايحة فين!

مفيش دقيقة وأنا مذهول من اللي أنا شايفه ولقيت واحد من
أفراد الأمن ماشي متعصب عمال يلف على المرضى في الاستقبال
يقولهم: (مين ابن ال***الي راكن التوكتوك بتاعه وقافل
مدخل المستشفى)!

أنا بكل ذهول علطول جريت روحت اسأل الأمن مدخل
مستشفى إيه!! منا جاى منه ومفيش تكاتك!! ومين الناس دول؟
فعرفت بقى إن المستشفى ليها بابين... باب رئيسي على النيل

بيدخل منه المدير والدكاترة والناس المهمة ونادراً لما مرضى بتدخل منه ... وباب تاني ورا المستشفى فاتح على عزبة في منطقة عشوائية، وقدام الباب دا بالظبط فاتح ٣ غرز عليهم ناس بيشر بوا مخدرات عينى عينك وبيتاجرو في كل حاجة لأن مفيش شرطة بتهوب هناك، وعرفت كمان إن الباب دا بقى هو اللي بيدخل منه ٩٠٪ من المرضى، محدش بيدخل من ع النيل خالص، فأدركت حينها أنها متيسرة .. لأ بجد متيسرة!

والباب دا أوزي ما أنا بسميه «الفجوة الزمنية» كان المدخل لأ أبطال أغلب مغامراتي في المستشفى دي، واللى هحكيها في فصول منفصلة متصلة في اللي جاي من الكتاب .. ومفيش ياسمين صبرى يا أبوعين تفلق الظلط ... منكو لله.

الجيرة 1

(بطولة أحمد عاطف السقا)

الموضوع متأخرش كثير عشان أقابل أول العجائب في المستشفى الجديدة.. من تاني نبطشية على طول والله كانت الصدمة والمفاجأة.. من تاني نبطشية حصل موقف من أغرب المواقف اللي قابلتني في أي نبطشية.

قاعد في أوضة استقبال العظام أنا والنايب السينيور (الدفعة الأكبر مني، اللي بيعلمني وبيأخذ بأيدي في أول فترات النيابة) وكنا عمالين نقرا في كتاب عظام، وهو ما شاء الله عليه كان عمال يشرحلي، أينعم مفهمتش أي حاجة منه بس كان شرحه جميل أوي (عشان هو غالبا هيقرأ الكتاب دا انما ف الحقيقة هو شرحه زى الزفت)

رجعت أنا بقى قعدت على الكرسي تاني جنب السينيور على
أساس نكمل قراية الكتاب لحد ما يجيب التذكرة، يدوب قعدت
ولقيته بيقول: «هو الواد ابن ال**** دا أتأخر ليه!! هو عاوز
يموتني!» وقام مطلع مطوة من جيبه وقال عليا الطلاق لأروح
اقتل ابن ال**** دا.. فالتاني حاشه وقاله اهدى أنا هروح أشوفه
أتأخر ليه، خليك هنا.

كدا متبقاش غيرنا أنا والسينيور والمجنون دا لوحدنا في أوضة
العظام، فلقيناه راح مقرب مننا، أنا قلقت الصراحة وكنت بفكر
جدياً استأذن منه أروح الحمام بس كنت خايف يقفش عليا أنا
والسينيور، المهم قرب أكثر، كل دا وإحنا قاعدين.. وفجأة قام
مطلع المطوة من جيبه تاني وقام مصرخ صرخة نادية الجندى
وقايل اااااااااه.. وراح غازز سن المطوة فنافوخه!

كل دا بردو وإحنا قاعدين مذهلين من اللي بيحصل مش فاهمين
ولا قادرين نستوعب اللي بيحصل قدامنا.. دا بجد دا ولا مجنون ولا
بيقتل قملاية ولا إيه اللي بيحصل!

وبعد ما غز راسه بالمطوة لقيناه فجأة بيزعق وبيخبط دماغه
فالحيطه بغباء وبيتكلم بلغة غريبة.. أه والله العظيم.. حاجة كدا
زي اللغة اللي كان بيتكلم بيها خالد الصاوي في نهاية فيلم الفيل
الأزرق!.

وبعد ما عمل الفقرة العجيبة اللي فاتت دى هوبا لقيته قام رافع

المطوة عليا أنا والنايب السينيور وبيهوش المطوة في الهوا علينا عايز
يعور واحد ، ساعتها بس قررت أخذ موقف، أنت عبيط يله ولا
إيه! بترفع المطوة على السينيور وأنا موجود!

عشان كدا من غير ما أفكر، بجد مافكرتش لحظة، قمت شايل
الكرسي الي كنت قاعد عليه وقمت حادفه ع النايب السينيور
بتاعي وطلعت أجري من الأوضة.

كان سينيور طيب والله

مات وهو نفسه يشرحي بقية الكتاب

يلا مش مشكلة بقى أبقى أقرأه أنا وخلص

ملحوظة:-الي عملته دا مكنش ندالة والله ... دي كانت تاني
نبطشية ومكتتش أعرف السينيور أو تربطني بيه علاقة أوي...
فقلت لنفسي عادي... لو اتقتل يبقوا يجيولي غيره بقا مش
مشكلة.

الجيرة 2

(كان ممكن أعمل الفصلين في فصل واحد.. بس السقا
عمل الجزيرة 2 وأنا مش أقل من السقا)

دا الجزء الثاني من قصة البلطجي المجنون اللي هجم عليا أنا
والنايب السينيور ف الاستقبال.. الجزء الأول ف الفصل اللي قبل دا
علطول، عشان اللي بينقي فصول عشوائية ومقراش الجزء الأول
يقراه عشان يفهم، مش عايز أسئلة ذكية.. أنا عمال أعالج السينيور
نفسياً لحد دلوقتي ومش ناقص.

المهم بعد منا بكل جرأة وشجاعة نفدت بجلدي من أوضة
العظام.. الراجل المجنون اللي كان عمال يخربش دماغه بالمطوة
ويعور ف نفسه ويخبط دماغه فالحيطة راح مثبت النايب السينيور
فالشيزلونج اللي ف أوضة العظام بالمطوة.

قعد يطلع أصوات غريبة ويزعق «مفيهاش حاجة إزاي يا ولاد ال
***** دا أنا واقع من الدور التالت.. أنا لازم يتعملي جبيرة.. يا
مستشفى بنت *****.. انا لازم يتعملي جبيرة يا ولاد ال *****».

السينيور يسكت! ... أبدا... قالي اعمله جبيرة يا عاطف ...
طبعاً أنا مش أهبل.. كنت مستحيل أعمل جبيرة للمجنون دا أو
أقرب منه، عشان كدا عملت نفسي أهبل وقولت للسينيور: «يعنى
إيه جبيرة!!».. وأقنعتة إني مبعرفش أعمل جباير مع إني عملت
في حياتي تقريباً حوالي ٢٤٣ جبيرة.. منها ٥٠ جبيرة كانت قدام
عينيه.. بس عشان هو طيب اقتنع بسرعة وعملها هو للبلطجي.

وخدوه الناس روحوه، خدوا البلطجي طبعاً، السينيور سابوه
ف الاستقبال عادي، وعدت النبطشية بسلام وعرفت من الناس
بعدها إن دا بلطجي ومدمن ومعروف جداً فالمستشفى وكل الغرز
والجروح اللي في إيده هو اللي عاملها لنفسه، لأ وليه مواقف من دي
كثير فالمستشفى بس الأمن بيخاف يمنعه يدخل عشان هو حاجة
زى زعيم البلطجية في المنطقة كدا! لا بيقدروا يمنعه يدخل ولا
حد يقدر يسلمه للشرطة أو يشتكيه لأنه هيرجع وينتقم منه، حاجة
زي الأفلام والله بالضبط، أما بالنسبة للهبل اللي عمله ده ناس قالت
إنه مريض نفسي وناس قالو إنه ملبوس بجنية هي اللي بتخليه
يعمل كدا، والسينيور مقالش أي حاجة من ساعتها، اللي حصله
ماكنش سهل بردو يا حبة عيني .

= بقولك ايه يا سينيور

- نعم !

= هو كل يوم فيه بلطجية بتتهجم عليك فالاستشفى كدا؟

- كل يوووووم ... ماعدا يوم الأثنين ده الاجازة بتاعتي فبيطلعوا

يتهجموا عليا فبيتي

سكن الأطباء

سكن الأطباء.. هتقروا المصطلح دا كتير في الكتاب، ف كان لازم أوضحكوا بعض النقاط الهامة للغاية، من كلمة سكن الأطباء كدا مع معرفتك إن المستشفى اللي روحتها متجددة وموجودة على النيل طبعي إنك هتتخيل سكن الأطباء دا عبارة عن دور كامل فيه أوضة بمفتاحها لكل دكتور، أو سويت كبير لكل قسم مثلاً وكل سويت ليه حمامه وفيه مجموعة من السراير فائقة الراحة.

أنا بردو كنت متخيل زيكو كدا، لحد ما طلبت من السينيور أحمد كمال في أول نبطشية إنه ياخدني يوريني مكان سكن الأطباء عشان أحط شنطتي فيه وأغير هدومي وآخد شاوري وألبس الإسكراب بتاعي وأنزل بدوافع وطاقعة إيجابية لقضاء النبطشية الـ ٢٤ ساعة.

لقيت أحمد كمال خدني طلعتني الدور الخامس، وهو في طريقه للسكن لقيته فتح باب أوضة مظلمة كدا فيها سرير واحد وخمس

مراتب اسفنجية قديمة للغاية متآكلة سمكها في أحسن الظروف لن يتجاوز الـ ٣ سم، والخمس مراتب واخدين مساحة الأوضة كلها مفيش موضع لقدم لأن الأوضة كانت ضيقة جداً غير إن كان فيه دولابين كبار واخدين جزء كبير من المساحة.

السريير كان عليه جثتين وكل مرتبة على الأرض كان عليها جثة ما بتتحركش! فأنا سألت كمال قولتله هو دي المشرحة ودول جث ناس ماتت؟ قالي يا بني دول دكاترة.. قولتله دكاترة ماتت؟

قالي يا بني لأ.. ماتت إيه.. دول نايمين بس كانوا نباطشين ٢٤ ساعة امبارح بس.. فسألته بكل اندهاش «طب المستشفى حبساهم ف الحجز هنا ليه؟.. هما عملو حاجة غلط؟.. قالي يا بني حجز إيه أنت مالك يا عاطف فيه إيه.. أنت مش قولتلي وريني سكن الأطباء! مهو دا السكن.. يلا ادخل.

أنا طبعاً اتصدمت وصورة سكن الأطباء اللي رسمتها أول ما لقيت المستشفى ع النيل وجديدة وبالسيراميك ادمرت، معقولة دا السكن! فين البسين والبلكونة!.. فين السراير!.. طب ليه سمك المراتب أقل من سمك البطانية!.. وإيه دا.. هو النور مبينورش ليه كمان!

رد عليا أحمد كمال وكأنه اعتاد على الأمر: «شغل كشاف الموبايل يا عاطف وادخل حط شنتطك جوه وغير وانزلي تحت بقى، اللنض بتاعت الأوضة بايظة من ٦ شهور».

قولتله طب خلاص استناني ع الباب ماتسبنيش لو حدي هنا،

ونورت كشاف الموبايل ومشيت وأنا بتحسس مواضع أقدامي بصعوبة خايف وأنا ماشى ناحية الدولار أمشي على رقبة دكتور تخدير نايم أموته أو اتكعبل في أيد دكتور جراحة أكسرها أو أدوس على بطن دكتور أطفال فيزمر ويصحي النايمين، لحد ما وصلت للدولاب بعد حركات بهلوانية تشبه إلى حد بعيد باليه بحيرة البجع للحفاظ على حياة جثث الأطباء النائمة بعد تعب النبطشيات.

المهم وصلت للدولاب فتحته لقيته يفتح معايا عادي خالص، لقيته بقى مليان شنط ولبس دكاترة وكروكسات بالإضافة إلى غيارات داخلية شديدة الخصوصية لأحد الدكاترة أو كما يسميها البعض «كلوتات» فحشرت شنطتي بينهم (بين الشنط أه) وقفلت باب الدولار ورجعت بنفس الحركات البهلوانية بس بصورة أسرع عشان كنت خلاص بقى اتدربت عليها وأنا رايح، ووصلت لكمال اللي كان مستنيني على الباب، بس رجعت وقولتله نسيت، قال إيه تاني، قولتله عايز ادخل الحمام هو فين الحمام اللي ف الأوضة.. قالي لا مفيش حمام ف الأوضة.. قولتله طب اللي بيصحى بيروح فين؟ يفتح الدولار ويتعامل جواه يعني ولا إيه!! قالي يا بني لأ الحمام ف الدور اللي تحتينا، وحمام بمفتاح عشان محدش يدخله إلا الدكاترة.

طبعا أنا سمعت كلمة حمام بمفتاح دي ورجعتي تخيلات المريضة تاني، قولت دا يبقى أكيد حمام كبير بقى وبانيو وبخار وحوارات مدام بمفتاح، بس كمال كان سريع جداً في تدمير أحلامي لتاني مرة، نزلني بسرعة للحمام وفتحولي وقالي انفضل.

دخلت لقيته مفيش مائة في الحنفيات أصلاً! ... آه والله ...
والشطاف بفتح كدا لقيته بيعمل صوت ومبطلعش مية! ...
ناديت لكمال من جوه قولتله المحبس فين الماية قاطعة.. قالي لا
دا هي اللي بايظة مش من المحبس.. إعمل حمام وظيفت أمورك
بمناديل لو معاك.

عملت حمام واستخدمت مناديل ورق كانت معايا واتصرفت
وظلعت لكمال قولتله: هو إنتو إزاي ساكتين ع القرف دا ... سكن
زي الزفت والنور بايظ فيه وقولنا ماشي.. إنها كمان الحمام اللي هو
المفروض أقل احترام للأدمية مفيهوش مائة! ... ابيسيبييه!
راح قافل باب الحمام بالمفتاح وقالي أنا نازل حصلني بقى دا
أنت يومك طويل شكله.

نزلت سألت على بتوع الصيانة وقولتلم إن نور السكن مش
شغال بس إحنا بتتصرف ونشغل كشاف الموبايل إنما الحمام بايظ
ومفيهوش مائة دا كدا كتير.. لازم حد يصلحه دا أدنى حقوقنا إن
يبقى فيه مية فالحمام وزعقت معاهم.

وبالفعل.. ما ضاع حق وراءه مطالب.. تاني يوم لقيت إزازة
سينا كولا اتنين لتر بلاستك مليانة مية ومخطوطة جنب القاعدة..
الي هو يعني اتشطف بيها ومتوجعش دماغنا!

شكرا يا مصر

لسه فيه أزايز تاني ولا خلاص كدا يا مصر؟

عيل قالع يا ولاد الحلال



في يوم وأنا قاعد في أوضة استقبال العظام عمال ألعب شطرنج
بخوافض اللسان لقيت عدى من قدام باب الأوضة سيادة مدير

المستشفى، أول ما لمحني قام داخلي الأوضة علطول، أنا قولت جاي يشوف الشيزلونج المكسور الي أنا قولتله عليه اتصلح ولا لأ.. لقيته بيقولي مش لابس البالطو بتاعك ليه يا دكتور؟.. فقولتله منا لابس سكراب أهو.. قالي مش كفاية.. فقولتله ماشي، هبقى ألبس البالطو.. روح شوف كنت رايح تهبب إيه بقى الله لا يسيئك.

وبعد شوية لقيت داخلي واحد من البلطجية الي «علوضعهم» الي بيدخلولي كل يوم، دخل وهو حاطط قميص مليان دم على راسه ومعاه أبوه الي ميفرقش أي حاجة عن الأستاذ «أرنولد شوارزنجر» خالص، نفس الهيئة ونفس الجسم والعضلات المبالطة من كل حته ونفس السحنة الي تقطع المكرونة البشاميل من البيت.

أبوه دا أول ما دخل قالي: «الواد مضروب على دماغه بحديدة وغالبا اتكسرت» فأنا بتلقائية والله ما أقصد حاجة قولتله: «الحديدة؟!!!».. قام قافش عليا ومبرق وقالي: (هتهزر يا أستاذ!!!)، دماغه هي الي اتكسرت وعاوزين نعمل «أوشاعة» نشوف هنجبسها ولا هنعمل فيها إيه!.. فأنا قولتله الدماغ وعظام الجمجمة دى مابتجسسش.. دا غير إنها مش تبعنا.. دى تبع قسم جراحة المخ والأعصاب.. روح استقبال الجراحة الأوضة الي بعد الي جاية.

قام متخلي صوته عشان أخاف.. عبيط جدا أقسم بالله..

ما يعرفش إني خايف منه أساسا من غير حاجة.. ولقيته بيقلبي: «طب
اعمله الإسعافات الأوليييييية هتسيبه كد!!!!!!»

فأنا قولتله ياباشا أوضة الجراحة بعدنا بمر واحد والله.. والله
العظيم هما اللي بيستقبلوا الحالات دي.. قالي: «عليا الطلاق لو ما
قومت عملت الإسعافات الأولية لأصور قتيل فالمستشفى دي».
بصيت حواليا ملقتش غيري.. بصيت لجسمه وبصيت لجسمي
وافتكرت جسم عم سعيد موظف الأمن اللي بره (ربنا يشفيه)..
أيقنت إن أنا اللي هبقى القتيل.. فروحت قايم بكل كبرياء وعزة
لافف رباط شاش حولين دماغ إبنه وحالقله دقنه بالمره عشان
كانت طويلة.

وبعد ما بعته استقبال الجراحة وكشفت على كام حالة تانيين
قولت أطلع الدور اللي فيه الحالات المحجوزة بتاعت قسم العظام
عشان أمر على الحالات وكدا، بدور على التمريض المسئول عن
الدور ملقتش حد فيهم، مش عارف راحو فين! ملقتش غير عيل
صغير ملامحه شبه الأستاذ أحمد موسى عنده بتاع سنتين لابس فانلة
قصيرة وبس!! مش لابس لا بنظلون ولا حاجة تحت البنظلون..
ولا حتى حاجة في رجله! لا وعمال يجري في الطريقة بتاعت الدور
بمنتهى الإنسيابية وبلا هدف محدد!

حاولت أدورله على أم ولا أب ولا حتى بنظلون يلبسه في المكان
المحيط ملقتش، حاولت أشد التيشيرت اللي لابسه أنزله لتحت

السياحة أدب

فجأة الساعة ١٢ بليل وأنا وزميلي قاعدين في نبطشيتنا في استقبال المستشفى لقينا ممرض عمال يجري يلف على الأوض ويقول: «كله يستعد..جالنا تليفون إن الإسعاف جاوية ٨ أشخاص مصابين ووزير السياحة جاي معاها» سألت ليه قالولي دول موظفين في احدى الوزارات الأتوبيس السياحي عمل بيهم حادثة وهم راجعين من مؤتمر لدعم السياحة!!... متخيلين فكرة الحادثة! عموما الممرض ملحقش يخلص كلامه وطلعت للاستقبال العام لقيت ظهرت كمية كراسي بعجل رهيبية، مع إن إحنا كان ما عندناش إلا كرسيين بعجل بس لنقل المرضى، واحد متكسر ونقدر نقول إنه من غير عجل، والثاني بعجل، بس نائب المدير واخده بيقعد عليه عشان مفيش كراسي.

ولقيت تمرىض جديد ظهر، ودكاترة جديدة ظهرت، ورئيس قسم الجراحة جه، ورئيس قسم الباطنة جه، ورئيس قسم جراحة

التجميل جه، مع إنا معندناش قسم جراحة تجميل أصلاً! ...
معرفش جابوه منين!

المهم وأنا واقف جنب المدير وإحنا في انتظار الناس اللي
حصلهم حادثة يدخلو، لقينا دخل عدد ٧ كائنات حية شايلين
شنط بلاستك وحاجات وفيه منهم اللي لابس شبشب بصوباع
وماشيين في وسط طرقة المستشفى بلا مبالاة كدا، المهم دخلو من
الباب الرئيسي وفضلوا ماشيين في الطرقة لحد ما طلغوا مالباب
الي ورا، المدير سألني مين دول.. قولتله إنت مش معانا فالدنيا ولا
إيه يا باشا.. مش عارف مين دول؟.. قالي مين!.. قولتله عادي ناس
بتخرم من جوه المستشفى.. بدل ما تلف حواليتها.

طبعا المدير بعد الموقف ده قام ساحبله كرسي متحرك من
الكراسي الكثير وقاعد عليه، وقعدت ألف بيه شوية فالمستشفى
عشان ينسى اللي شافه.

وشوية والإسعاف جات وقامت منزلة كام واحد على أساس إن
دي الحادثة الي إحنا مستنينها من بدري، أبص الاقيلك كلها بلا
استثناء ناس نازلة صحتها أحسن مننا والإصابات بتاعتهم طفيفة
جداً مش مستاهلة القلبية دي كلها.

غير كدا عرفت إنهم راحو مستشفى تانية قبل ما يجولنا،
وبعد ما خدوا علاجهم فيها واتعملهم اللازم، الإسعاف جابتهم
فالمستشفى بتاعتنا عشان نضيفه وجديدة ووزير السياحة والصحافة

والناس اللي هتصور لما يجوا ينسطوا، الموضوع كله شو إعلامي يعني.

يكفي إني اقولكم إن أخطر إصابة فيهم كان واحد صوباع إيده متعور (أو بمعنى أصح فيه أوف).. راحو مقعدينه على كرسي بعجل فيه مليون مريض تاني في المستشفى في حاجة ليه!! آه والله.. اللي هو شوية كمان كان ناقص ينزلنا واحد من الإسعاف نقوله مالك يقول مش عارف حاسس إني مأريف شوية.. فنقوم نجبله رئيس قسم الجلدية يلعب معاه كونيكت فور.. حاجة أقسم بالله مسخرة البرابير.

بس وبعد شوية جه وزير السياحة اطمن عليهم وأبدى إعجابه بديكورات المستشفى والكراسي بعجل وشكر كل الصحفيين اللي كانوا موجودين وطمنهم إن كله ف الكلتش والوضع تحت السيطرة واتصور وهو بيحب المصابين، وأمر دكتور العناية إنه يسحب الحالات الخطيرة اللي ف إيده ويفضل جنب الراجل اللي متعور في صوباعه ينفخله ف الواوا لحد ما تخف.

وخليناه مشي وقومنا ضارين العيال اللي عاملة نفسها متعورة دي وخذنا الكراسي العجل بتاعتنا

مش هنهرج إحنا

الفلوس الحلال ما بتضعش

موبايلي ضاع في المترو.. أو خرينا نتكلم بواقعية.. هو اتسرق مني في المترو.. طبعاً زعلت جداً!!!!!! عليه وكان يوم كئيب للغاية بالنسبة لي خصوصاً إني كنت حاسس بتأنيب الضمير عشان إزاي اتسرق كذا من غير ما أخذ بالي!

ومكتش راضي اقتنع إن الطبيعي جداً إني اتسرق وسط الزحمة الشديدة دي.. ووسط الأستاذ سيد اللي حاطط مناخيره في ودي.. والأستاذ رأفت اللي يبطلع بخار مية من بؤه في نضارتي.. دا غير الأربعة اللي كانوا حاضنين بعض جامد أوي وحاضنيني معاهم وهما نازلين محطة الشهدا.. اللي يغيظ إني مش نازل الشهدا بتحضنوني ليه طيب!!

عامة استعوضت ربنا في الموبايل بقى والحمد لله على كل شىء.. بس كنت حزين جداً!!!! من جوايا.. لكن بقى شوفو القدر الجميل عشان الموبايل فلوسه حلال إيه اللي يحصل.. ألاقى فالنبتشية

الي بعد سرقة موبايلي علطول ست دخلاي شايلة ابنها الصغير
الي شبه ألباتشينو العرب الفنان محمد رجب ذوال الستين ونص
وبتقولي الواد وقع على دراعه يا دكتور.. ف كتبله أشعة فالست
راحت عملتها وجاتلي.

خدت الأشعة منها وشوفتها وقعدت أدور فيها على أي كسور..
أي شروخ.. أي موبايلات مسروقة «مهو شبه محمد رجب بقى لازم
أشك فيه».. المهم لقيت كسر بسيط كدا.

قولتلها ابنك فيه كسر بسيط وهنجبسه.. فطبعاً زي أي أم مصرية
بدأت تفاصيل.. طب مينفعش نكتبله مضاد حيوي وخلاص؟..
طب مينفعش نلفها برباط ضاغط وخلاص؟.. طب أنا عندي
مرهم جايلنا من السعودية أخضر كدا.. أدهنله منه وخلاص؟..
طب فيه كلبة ف اوزباكستان بيقلوا البنها فيه الشفا مرضعوش
منها؟

وف النهاية لم تجدهزة الست العجيبة مفراً معي إلا إن ابنها
يتجبس.. فقالتلي ماشي بس جبسه كويس يا أستاذ.. قولتلها..
ماشي (:).

وبدأت أجبس الواد بهدوء.. الواد الي كان كل ما ألف رباط
جبس على إيده كان بيحط إيده على الجبس المبلول ياخذ شوية
جبس ويحط ف بؤه.. يا بني يا حبيبي هتخلص الجبس!.. كفاية!
.. والله ما جبنة براميلي!

وبعد ما عملت للواد ساندوتشين جبس يتأوت بيهم وبعد ما
اقنعت أمه إن الجبس لازم يبقى فوق الكوع مش على الحتة المكسورة
وخلص.. قدرت أنتهي من الجبس.. وما شاء الله عليا.. عملتله
جبس جامد جداً.. كل دا وأنا حزين من جوايا على الموبايل اللي
اتسرق ومش متخيل في لحظة إنه ممكن يرجع تاني.. تخيلو بقى
بعد ما خلصت الجبس ولسة بعلق ذراع الواد أبص ألقى إيه!..
ألقى الست بتحطلي خمسة جنية كدا متكورة ف بعضها ف جيبي
وبتقولي:(أشرب شاي)!!

مهمة مستحيلة

في نبطشية من النبطشيات القمر الي الواحد يشيلها، لقيت دكتور الجراحة زميلي داخل عليا وبيقولي أنا خارج بره المستشفى أجيب حاجة وراجع بسرعة.. ربع ساعة مش هتأخر.. وطلب مني أخلي بالي من أوضة الجراحة عشان لو مريض جه ولا حاجة اتصرف لحد ما يجي.

طبعاً أنا ما فكرتش، قولتله لأ.. مليش دعوة.. إلا الجراحة يا عم.. لاااااا شوف حد تاني.. طبعاً هو اندهش من أفورتي دي.. بس هو ما يعرفش إني متعقد من قسم الجراحة العامة دا من زمااااااان.. بصوا.. هحكيلكو:

أول وآخر عملية نصب أعملها ف حياتي كانت بسبب قسم الجراحة.. وكانت في فترة الامتياز.. بس كنت مجبر والله.

في بداية الامتياز بتاعي في مستشفى الجامعة كان أول شهرين عليا

جراحة.. المهم نايب الجراحة الي مسئول عني قالي اطلع مر على حالة فتحية ونوال فالعنبر عشان أنا عندي عمليات كثيرة.. فطلعت علطول زي الأهل وأنا كلي ثقة مفعمة بروح المجدي يعقوب الي كانت مالية الدفعة كلها أيامها وإحنا فالحقيقة كنا لسة متخرجين ولا فاهمين أي حاجة فالمهلبية أصلاً.. طلعت حتى من غير ما أسأله الحالات دي عاملة عمليات أيه.

وأنا طالع ع السلم قابلت واحد صاحبي ف سكتي.. قولته تعالى يا اسطانمر بسرعة كدا على حالات الجراحة وننزل مع بعض.. قالي إشطة يا حبي تعالى وطلع معايا.

دخلنا عنبر الجراحة الي كان وقتها عامل بالظبط زي سوق التلات، أوضة واسعة مليانة سراير نايم عليها المرضى وقاريهم فارشين حصير وقاعدين جنبهم بأكل وحلل محشى كرنب وفاكهة ومنتجات البان .

المهم أنا سألت فين سرير فتحية فالي معاها قالولي إحنا أهو.. فروحت بكل ثقة اطمنت عليها وقيستلها الضغط وكله تمام.. وبعدين لقيت راجل عامل زي متوازي المستطيلات بجلاية وشنب كبير جدا!!!! بيقولى:(الأوستاس تمرير ولا ضاكتور؟).. فأنا بكل فخر و افتخار قولته دكتور.. قالي أنت الي عامل العملية؟.. فمن غبائي قولته آه قال يعني عشان أرسم نفسي.. مع أني مش عارف هي عاملة عملية أيه أصلاً.

فلقيت جوزها بيقولي طب إحنا عاوزين المرارة بتاعتها إحنا
مخدنهاش.. فأنا قولتله مرارة إيه!!.. قالي المرارة الي أنت شيلتهاها
امبارح.. عاوزينها.

فأنا استنتجت إن العملية كانت استئصال مرارة.. فقولتله آه آه..
المرارة سيبتها فالعمليات عشان كانت مليانة حصوات.. فقام قالي
حشرات!!!... قولتله حصوات... حصوات.....ات... ولو عايز
تأكد إنها اتشالت ممكن تعمل سونار وهييان.

قالي لا مش كدا.. أنا عاوز المرارة نفسها.. وقعد يتكلم كلام
كثير مفهمتش منه غير إنهم معندهمش حاجة اسمها أعضاء حد
من عيلتهم تبقى مع حد غريب وإنهم حتى لما الدهشوري عمل
الزايدة السنة الي فاتت خدوا الزايدة بتاعته وهما ماشين.. فأنا
قولتله والله مش هينفع اجيبها لك للأسف.

لقيت قام من عالحصيرة أربعة ميتخبروش عن الحاج وقالولي:(لأ
أنت هتجيبها).. فأنا علطول جبت ورا وقولتلهم طيب هي هناك
فالعمليات هروح أجيبها وآجي.. ورايح أمشي أنا وصاحبي عشان
نخلع من التوريطة السوداء الي ورطنا نفسنا فيها دي لقيت واحد
منهم راح ماسك دراع صاحبي وقاله لأ أنت هتفضل معانا لحد ما
يرجع.. قصده عليا.

فأنا قولتلهم يا جماعة عيب كدا.. قالولي لأ عشان نضمن إنك

هترجعلنا بالمرارة، عشان إحنا هنصور قتييل الليلاادي لو المرارة
مارجعتش.. أنت تالت واحد يقولنا هجيب الزفت وآجيلكم
بسرعة ومانشوفش وشه تاني.. فماكنش قدامي غير إني سييتهم
ومشيت وأنا مش عارف هعمل إيه.

طبعا أنا كل الي كان هامني إزاي أخرج صاحبي من المأزق
الي أنا حطيته فيه دا وبعدين أسيب قسم الجراحة ابن ال***
دا خالص... فطلعت جري لنايب الجراحة الله يخربيته أقوله فين
أم المرارة.. ملقتهوش.. لقيته اختفى.. قعدت أدور على أى حد معاه
مرارة زيادة مش محتاجاها مفيش.. طب أعمل إيه الله يحرقكو..
صاحبي رقبته هتطير بسبب ولاد الهبله دول.. دول كأنهم مخطوف
منهم عيل.. واخدين الموضوع على كرامتهم بشكل عجيب!

المهم وأنا عمال أفكر جديا إني استعوض ربنا ف صاحبي.. لقيت
طفل برىء ف طريقة المستشفى ماسك كيس جيلي كولا وبيلعب..
دخلت عليه إزيك يا غسل اسمك إيه؟ فالواد وشه اتخطف من
البالطو بتاعي.. وقالي وهو مرعوب: اسمي كريم.

فقولتله ماتخفش يا كريم هسيبك تلعب وهمشي.. بس ممكن
تديني واحدة مالكيس؟.. فالواد من خوفه أداني الكيس كله..
فخذت أتئين منه ومشيت.. كلت واحدة وروحت مبطط التانية
جامد بأيدي ومغرقها بالبيتادين كأنه دم ولافها ف شاشا بيضا

55 إسعاف

في نبطشية جديدة من نبطشياتي في استقبال العظام، في أول اليوم كدا والدنيا هدوء لسه ومفيش مرضى، لقيت فجأة مدير المستشفى داخل عليا بخطوات سريعة متسارعة، أنا قولت ف نفسي «منا لابس الباطو أهو داخل ليه دا؟» لقيته مبصليش أساساً، دخل علطول ناحية الشيزلونج اللي إحنا مبلغين إنه بايظ بقاله كام شهر وقام مختبر مرونة المرتبة الأسفنج اللي عليه وقعد يضغط عليها بطريقة البطة اللعبة اللي بتزمر، مش عارف بيعمل إيه دا وهي أصلاً مفسية! المهم قعد يضغط شوية وبعدين خرج مبسوط!.. استتيت بعد كدا ناس تدخل بمرتبة جديدة أبداً!!!!!!

شوية ودخلي أتنين من الإسعاف ومعاهم أتنين مصابين، كشفت على أول واحد سألت عن الحادثة بتاعته قالولي الموتسيكل وقع بيه وهو سايقه، خلصت كشف وروحت للمصاب التاني أشوفه، قولتلهم دا جاي معاه في نفس الحادثة؟ قام المسعفين الأتنين ابتسموا

وبصوا لبعضهم كدا وهما مبتسمين.. قولتلهم إيه!! حادثة تانية؟
..قالولي لا دا إحنا خبطناه ف طريقنا وإحنا جاين.

المهم الأثنين المصابين طلعا كويسين الحمد لله مفيهو مش أى
كسور، كتبت علاج للمصاب الأصلي ومشيته، واللي هما خابطينه
كان فيه جرح بسيط كدا قولتله تعالى أقعد هنا عالشيزلونج أحطلك
بيتادين وغيار، فبتوع الإسعاف قعدوا يقولوله ألف سلامة يا حاج
والله ما كنا نقصد، إحنا مستينيك أهو نروحك بنفسنا لحد البيت.

قالهم لأ أتكلموا مع الله إنتوا شوفوا شغلوكوا أنا ساكن جنب
المستشفى واتصلت بمراتي جاية، فقالوله: المهم متكونش زعلان
مننا وقامو بايسين راسه.. قالهم: إزاي دا إنتوا زي ولادي هو
نصيب.. اتكلوا مع الله يا حبايبي مع ألف سلامة.. فقالوله مع
السلامة في مشهد درامي مؤثر للغاية مكنش ناقصه غير الموسيقى
التصويرية بتاعت مسلسل المال والبنون.

هما مشيو من هنا ولقيت الحاج بيسألني بيقولي ولاد ال****
دول اسمهم إيه يا دكتور عشان هعمل محضر؟ قولتله هتعمل
محضر!.. إنتو مش لسه متصالحين وبايسين بعض!.. قالي لا دا
عشان أفاجئهم بالمحضر ما يکنوش رتبوا نفسهم.. أنت عارف
البلد دي يا دكتور بقا.. المهم اسمهم إيه؟

فأنا طبعاً معرفش اسمهم لأن الإسعاف دي هيئة مستقلة بحد
ذاتها مش شغالين معانا في المستشفى زي مال الحاج فاكر.. فأنا قولتله

والله ما أعرف يا حاج.. قالي لا أكيد أنت عارف يا دكتور قول..
قولته وربنا ما أعرف.. قام متنهد تنهيدة طويلة وقالي بص يا ابني
أنا موظف ف الشهر العقاري بقالي أكثر من ٢٥ سنة و.....و.....
وقعد يحكي لي بقى عن خبراته الكبيرة في المجال وفالحياة عموماً،
وحكالي عن حنكته في تربية أولاده وعن الأسطورة الأخريرية
ميدوسا وعن حاجات بالهبل ملهاش أي علاقة ببعض وأنا أقوله
ماشي يا حاج.. تمام يا حاج.. لحد ما قطعت عليه حديثه اللي
كان مستمتع بيه وقولته ممكن حضرتك تقولي النقطة اللي عاوز
توصلها؟.. قالي أنا عايز أقولك إني مش بعد العمر دا كله هتضحك
عليا وتقولي إنك مش عارف أسماء الأثنين بتوع الإسعاف دول..
اسمهم إيه يا دكتور أنا مش ماشي إلا لما تقول؟.. فزهقت طبعاً منه
قمت مملية اسم مدير المستشفى واسم واحد كان كدا بشوفه ماشي
معاه علطول.

بس ومشي الحاج ولحتلكو دكتور جراحة ماشي حزين كدا

ف الطريقة

قمت جايه يحسس ع المرتبة الأسفنج بتاعتنا عشان نفسيته

تتحسن شوية

الرجل السويتش

أى فيلم أو مسلسل يبقى ليه الموسيقى التصويرية أو الخلفية الموسيقية بتاعته الخاصة بيه اللي بتميزه عن أى مسلسل أو فيلم تاني، ممكن تكون مؤثرة، ممكن تكون لايت وكوميديا، على حسب نوع المسلسل يعني، أهو إحنا بقى كان عندنا كمان خلفية موسيقية بتميزنا بردو عن أى مستشفى عام في الكوكب كله، بس للأسف كانت خلفية مزعجة بنت ***.

حد هيسألني ويقول إيه الخلفية الموسيقية بتاعت المستشفى دي؟ جت منين؟؟؟... هقولكم إنها اللعنة التي لا تفارق المستشفى.. إنها الـ «كول سيستم» الخاص بالمستشفى «call system» أو كما يسميه العاملين بالمستشفى «السويتش».

في الأول هشر حلکم الكول سيستم الطبيعي في أي مستشفى عام بيكون عبارة عن إيه وليه.. الطبيعي في أي مستشفى عام في مصر بيكون فيه موظف اسمه موظف السويتش، ودا موظف بيكون

مهمته فقط في حالة الطوارئ القصوى أو الحالات اللي بتحتاج تدخل سريع جداً زي حالة توقف القلب أو حالة لسة داخلية المستشفى خلاص هتموت أو بتقرب من الموت ف لازم تتلحق بسرعة والدكتور لو في أي مكان أو مع أي حالة تانية أقل أهمية يسيها بسرعة ويتجه لمكان الحالة اللي بتموت دي.

وهنا بقى بيتجي وظيفة فني السويتش، وهو قاعد في أوضته بيتكلم في المايك بتاعه يقول «على طيب القلب (مثلاً) التوجه لاستقبال الطوارئ للأهمية» فكلامه دا يتسمع في كل أرجاء المستشفى في نفس اللحظة، لأن فيه سماعات موجودة في كل مكان في المستشفى متوصلة بالمايك اللي معاه، بحيث لو الدكتور موجود في السكن يسمعها وينزل بسرعة، لو في أي غرفة فالمستشفى يسمعها وينزل بسرعة، لو في حمام المستشفى يسمعها ويتشطف بالإزاة وينزل بسرعة (معرفش بسرعة إزاي والإزاة بتأخذ وقت بس ما علينا) المهم صوت موظف السويتش بفضل السماعات المنتشرة هيوصل للدكتور أي كان مكانه.

موضوع إن موظف السويتش يطلب الاستغاثة العاجلة من الطبيب دا بقى ممكن يحصل مرة في النبطشية، مرتين في النبطشية، ٣ مرات بالكثير أوي لو النبطشية دي فقر وكلها حوادث وبلاوي سودة وخلاص يعني المباني عمالة تنفجر جنب المستشفى، إنما عندنا إحنا فالمستشفى ربنا أنعم علينا بموظف سويتش فريد من نوعه، فاهم السويتش ونظام الكول غلط، فاكره مثلاً نجوم إف إم، طول

اليوم عمال يتكلم ف المايك بصوته المزعج الي بيزعق دايمًا، فتلاقيه طول ما أنت قاعد عمال من نفسه بقى يوجه رسايل للتمريض، بيناشد المرضى، بيهزر مع أصحابه ويسمع كل المستشفى، وكله كوم وإنه يشغلنا في الأعياد أغاني دا كوووم تاني خالص، يعني عيد الأضحى تلاقيه مشغل الصبح في بداية اليوم «العيد فرحة»، رمضان يجي تلاقيه مشغل «رمضان جانا»، عيد الأم «أمورتي الحلوة بقت طعمة»، آه والله ما بهزر شغلها فعلاً في عيد الأم!

دا غير إنه قرر يقعد في أوضة المراقبة بتاعت الكاميرات الي المفروض إنه ملهوش أي علاقة بيها وقرر إنه يخليها جزء من شغله، فبقى يتفرج يتابع كل صغيرة وكبيرة بتحصل في المستشفى ويشوفها في الكاميرات ويعلق عليها في الكول ويسمع كل المستشفى، ويدي أوامر في حاجات هو ملهوش فيها أصلاً ودي مجموعة من النداءات الي سمعتها منه على سبيل المثال لا الحصر الي بتدل على إنه بيعمل abuse أو إساءة استخدام للكول سيستم:

= الأستاذ الي قاعد الكونتر.. إنزل يا أستاذ مينفعش كدا

= العيال الصغيرة الي قاعدة الكونتر.. تنزل لو سمحتم
مينفعش كدا (مش فاهم الكونتر دا كاتبه ف القايمة ولا إيه أنت
مالك!!)

= ممرضة بنك الدم برجاء الردع التليفون

* ماردتش لأى سبب كان *

= الست اللي معدية من قدام بنك الدم .. ادخلي قوليلهم يردو
ع التليفون (آه والله .. وصل بيه الأمر إنه يدي أمر لست معدية
فالطريقة عادي مبتشتغلش فالمستشفى يعني مريضة أو جاية مع حد
تعبان)

= نتعامل مع بعض أحسن من كدا يا جماعة .. أى قلة ذوق من
أى حد أنا مش هسكت وهو عارف نفسه أنا فيا اللي مكفينى (دا
مرة زهق على حد معين فقرر يزعق لكل المستشفى ف الكول)

= أم وليد .. الله على مسحك يا ست الستات .. إيه الحلاوة دى
عمال يتفرج على أم وليد وهي بتمسح في أحد أماكن المستشفى
فالكاميرات وبيشكرها ف المايك كمان ... وغالباً «الحلاوة» عايده
على أم وليد مش المسح)

= نحب نهني السيد الدكتور محمد القرنفلي مدير المستشفى
بمناسبة عيد ميلاده أعاده الله على المستشفى بالخير واليمن
والبركات (أيوة قال كدا حرفيا وكانت تطيلة وسعت منه جامد
جداً .. بس حقه .. المدير سايبه يلعب بالمايك براحتة الصراحة .. دا
غير إن المدير قريبه أصلا ودا بيفسر إن مفيش حد قادر يكلمه)

= برجاء من موظف الأمن أشرف محمد بسرعة التوجه إلى غرفة
السويتش للأهمية القصوى (أشرف طلع قلنا بعد كدا إنه كان
باعته عايز سيجارة منه)!

أنا يا بنتي!!

في يوم جميل كئيب يشبه إلى حد كبير الأستاذة رضوى الشربيني، دخلتلي ست في منتصف الثلاثينيات باين عليها إنها معيطة، وجاية تشتكي من إيديها وضهرها.

سألتها إيه اللي حصل لإيديها قالتلي وقعت عليها، بس كان واضح إنها مضروبة بحاجة على إيديها مش شكل وقعة دي، قولتلها لأ إنتي مضروبة صح؟ قالتلي لأ وقعت عليها يا دكتور ولقيت عينيها ابتدت تنزل منها الدموع، قولتلها على فكرة أنا مش بحقق معاكي أنا بسأل بس عشان شكل إيدك مضروبة بحاجة، قالتلي: آه جوزي ضربني بخشبة على إيدي وضهري.. وقعت تحسبن عليه شوية وتشتمه.

المهم كتبتلها على أشعة وراحت تعملها، وبعد ما شوفت الأشعة طلع فيها كسر في أيديها، فأنا قولتلها إيديكي للأسف فيها كسر وهتحتاجي جبس، فقعدت تعيط، فقولتلها: «متقلقيش كسر بسيط إن شاء الله وكلها شهر ولا حاجة وتفكي الجبس.. ولو عايزة

نعمل محضر لجوزك.. الموضوع سهل.. عشان يحترم نفسه ويبطل
غباء» فقالتلي: «أنا زهقت من العيشة دي يا دكتور.. دي مش أول
مرة يضربني.. أعمل اللي أنت شايفه صح».

فقولتلها لا يبقى لازم عملي محضر بقى على الأقل عشان تخوفيه
ومايعملش كدا تاني.. قالتلي ماشي.. فقولتلها أنا هكتبلك تقرير
مبدئي في التذكرة وهتيجي الصبح إن شاء الله بقى تاخدي التقرير
النهائي.. قالتلي تمام.. فبعد ما عملتلها الجبس قعدت على الشيزلونج..
وأنا روحت قعدت على المكتب أكتب التقرير المبدئي في التذكرة.

وفجأة وأنا بكتب.. لقيت واقف ع الباب راجل على شكل
تلاجة.. حاجة ضخمة ومهولة جداً ما شاء الله ومخيفة.. فالست
أول ما شافته ودت وشها الناحية الثانية مقموصة.. فأنا استنتجت
إنه جوزها.. المهم الراجل قالها بصوته الفولاذي: «هو طلع فيه
حاجة ولا إيه!» فالست قالتله: «أيوة طلع فيه كسر وهقعد شهر
فالجبس.. والدكتور قالي لازم أعمل ليك محضر وأنا قولتله لأ».



حلم عجيب

دايما بسمع وبقراً عن الأحلام الي غيرت حياة أصحابها واستفادو منها وأفادو الناس كلهم، زي أينشتاين الي حلم بحلم ساعده في وضع النظرية النسبية، ومنديلوف صاحب الجدول الدوري بتاع الكيمياء الي فضل يدرس ويفكر في طريقة يرتب بيها العناصر الكيميائية وفجأة وهو نايم تعبان حلم بالجدول الدوري كله بترتيبه الحالي ف صحي من النوم كتبه على ورقة ونقشه زي ما شافه في الحلم بالظبط، ومؤسس «جوجل» الي قال إنه حلم إن هو وصديقه بيحطوا جميع المواقع الي على النت في الكمبيوتر بتاعهم الي كانت نواة لفكرة محرك البحث جوجل بعد كدا، وجميس واتسون مكتشف بناء الحمض النووي الي حلم بثعبانين متشابكين زي الـ DNA وهو نايم ساعده بعد كدا في وضع تصويره عن الحمض النووي، ومش فاكر الشاعر مين الي حلم بقصيدة وصحي كتبها كسرت الدنيا وغيرهم وغيرهم كتييييير.

المهم أنا كنت دايمًا بسمع عن الحاجات دي وأقول ربنا يرزقنا بالأحلام بنت الناس دي، لكن أنا ليه بعد إحدى النبشيات اللي اتنفخت فيها أطلع أنام في السكن بتاعنا في المستشفى عشان استريح فـ أحلم إنى متهم بجريمة قتل! والمقتول هو الفنان محمد رمضان!!

وليه أترمي في السجن في الحلم وأنا خايف ومش عارف قتله ليه ولا إمتى ومش فاهم حاجة! حتى مش متأكد إنى برىء! وليه وكيل النيابة يطلع دكتور صاحبي اسمه عبد العليم بيحقق بالقضية وهو لابس اسكراب كحلي وبالطو أبيض وأنا واخده بجدية عادي جدا وماضحكش!

وليه اللي تبلغ عني فالحلم وتتهمني بقتل محمد رمضان تكون أختي!.. ليه ف الآخر تظهر برائتي وأفرح وأطلع من السجن ويفتحولي الباب الأقي محمد رمضان هو وبابا وماما وإخواتي مستنيني وياخدوني بالحضن!.. محمد رمضان اللي مفروض اتقتل!

لا ويبوسني ويقتولي كنت متأكد إنك مش أنت اللي قتلتني وأنا احضنه عادي جدا مع إنى مبجهوش! وحاجات منيلة وعجبية كثير بس مش فاكرها أو فاكرها طشاش مش قادر أجمع تفاصيلها.

بس تظل أعظم الحاجات اللي فاكرها من الحلم دا هي كيفية قتل محمد رمضان.. عارفين مين اللي طلع قتله!.. منى الشاذلي.. آه والله.. ولما عبد العليم صاحبي وهو بيحقق معاها سألها قاتها قتله

إزاي؟.. قاتله إنها حطته سم ف إزازه المانيكير ومحمد رمضان شربها.. آه والله العظيم اتقتل كدا!.. والقضية اتقفلت عادي وصحيت!.

= خد إزازه المانيكير دى اشربها

- ما أنا عارف إني هشربها أمال هحطها على ضوافري* بصوت غبي

منه فيه*

يا رب إمتى هحلم حلم مفيد بقى

يا رب إمتى هبطل الأحلام الهبلة دي

كفاياك ممبر

معلومة (١):

من أهم أسباب خشونة الركبة عند الست المصرية هي زيادة الوزن.

معلومة (٢):

من أهم وسائل علاج خشونة الركبة وتحسين آلام المفاصل هي الريجيم وإنقاص الوزن، كل كيلو بتنقصه يعمل تحسن ملحوظ جداً في الأعراض.

معلومة (٣):

من أهم أسباب وفاة أطباء العظام هي محاولة إقناع ست مصرية بتعاني من الخشونة بإنقاص وزنها، لأنها مش معترفة أصلاً إنها تخينة!

آه والله، أنا كنت فاكِرَ إني لما أُسيب الوحدة الصحية واتخصّص
عظام إني هبعَد عن الستات بقى بتفاصيلهم بدوشتهم بس
اكتشفت العكس، إني دخلت جوه تفاصيل تانية أنيل وأنيل، بقت
الست تجيلي بخشونة وهي وزنها معدي الطن ونص وتزعَل لو
قولتلها لازم تقللي وزنك وتبصلي من فوق لتحت، طب تتقمصي
من جوزك ماشي، إنما أنا الدكتور يا ولية أنا مالي أنا، أنا بقولك
النصيحة الطيبة، وزنك زايد هقولك لازم تخسي عشان دا جزء من
العلاج مش عشان أنا عايزك سمبتيك فالبيت وعودك يبقى زي
عود الفنانة منة شلبي!

يعني مثلاً ست في العيادة بتاعت المستشفى بقولها «وزنك زايد
يا مدام ولازم ينزل شوية».. لقيتها بتقول:

- هو فين اللي زايد دا يا دكتور!!!

.. هو إيه اللي فين!!!.. أشاورلك على اللي زايد يعني ولا أعمل
إيه مش فاهم!

ست تانية.. «وزنك زايد يا مدام ولازم ينزل شوية»

- والله ما زايد يا دكتور.. دا كل دا مية ماتنخدعش

= ياااااه.. أنا فعلاً كنت انخدعت

معلش

قاعد في النبطشية في أمان الله لقيت داخل عليا واحد قالي وبكل ثقة: (لو سمحت كان فيه دكتور عظام هنا عندكو فيه شعر كتير ف إيده .. هو فين؟) .. فأنا استغربت طريقة الوصف دي أوي وبصيت لأيدي وقولتله: (طب ما إيدى فيها شعر أهو .. إيه الفرق بقى !!) .. قالي: (لا .. التاني فيه شعر كتيسيسير)!!.. قولتله كتير كام شعرة يعني! فقالي باين اسمه محمد أو إبراهيم حاجة كدا.. قولتله بغض النظر يعني حضرتك عاوز إيه؟.. قالي إحنا محجوزين في الدور الرابع وعاملين عملية عظام لابن أختي إبراهيم محمد السملوطي في رجليه .. كنا عايزين بس يا دكتور نغيرله الجبيرة عشان الجبيرة اللي موجودة دلوقتي مضيقاه.

فأنا قولتله خلاص شوية كدا وهطلع أغيرله الجبيرة من عينيا.. قالي ألف شكر يا دكتور وطلع فوق.

بعد شوية لما الدنيا هدبت فالاستقبال، طلعت الدور الرابع

روحت للكونتر بتاع التمريض، لقيت مس «أم مازن» قاعدة بتاكل فول سوداني.. قولتلها إزيك يا مس.. قالتلي إزيك يا دكتور تعالي كل سوداني.. قولتلها معلش مرة تانية.. هو لو سمحتي الأوضة اللي محجوز فيها الطفل إبراهيم محمد السملوطي رقمها كام عشان عايز أروحله؟

قالتلي: «والله ما عارفة يا دكتور.. أفضل فّتح ف الأوض أوضة أوضة وأنت رايح كدا لحد ما تلاقيه».. قولتلها بغض النظر عن الفكرة الاقتحامية الرائعة المستمدة من أفلام القوات الخاصة الأمريكية ولعبة pubg.. أنا مش عارف شكل إبراهيم أصلاً!.. هعرف إن دي أوضته إزاي لما افتح!.

قامت نافخة وسايبة السوداني اللي ف أيديها وقالتلي أمري لله.. أنا قولت هتقوم تيجي معايا.. لقيتها راحت فاتحة درج في الكونتر جنبها.. جنبها حرفياً.. ماتحركتش من مكانها.. مجرد بس اضطرت تشغل العضلات الباسطة للعضد والساعد الأيمن وتفتح الدرج.. وراحت مطلعة منه ورقة مكتوب فيها الحالات المحجوزة وأرقام غرفها، وقالتلي إبراهيم في أوضة ٤١١!!

روحت بقى لأوضة الطفل إبراهيم.. لقيته عنده كدا بتاع ٩ سنين وعنده كسر في رجله.. وسألته لقيت الجبيرة مضيقاه فعلاً.. فقررت أغيرهاله وكنت جايب معايا حاجات الجبيرة من تحت من الاستقبال ومجهز كل حاجة.

عيد ميلاد هولاءكو



وأنا في سكن الأطباء شوفت بالصدفة لقاء جميل جداً على قناة نايل
دراما، يكفي إنى أقولكم إن الحلقة بيحتفل فيها الفنان أحمد ماهر بعيد
ميلاده في البرنامج عن طريق إنه بيقطع التورتة بسيف كبير!

آه والله زي ما إنتو شايفين كدا، طبعا الأستاذ أحمد ماهر من مدرسة الأفورة الجميلة بتاعت زمان، عشان كدا السيف دا كان حاجة من ضمن حاجات كتييييير أوفر في الحلقة.

الفقرة الأولى كانت فقرة الأقوال الماثورة وإبداعات المذيعه في كلامها عن أحمد ماهر:

= أول قول مأثور ليها كان: (طبعا زي ما قولنا لكم إن النهارده مش عيد ميلاد أحمد ماهر، عيد ميلاده يوم ١٣ - ٨ بس إحنا قولنا نحتفل بيه ١١ - ٨ النهارده عشان هو عاوز يحتفل بيه فاليبت مع أسرته).. وبعدين بكل جدية وإحساس إنها بتقول معلومة مفيدة قالت: (١٣ أو ١١ تمانية الأثنين بيقعوا في نفس الشهر طبعا).. يا سلام!!!!!!!!!!!!!!م ... سبحان الله... اللي هو بتحسك إن ١٥ و ١٦ و ١٧ تمانية بيقعوا ف شهر سبعة!.

= ثاني قول مأثور ليها قالت: (الأستاذ أحمد ماهر بقا برج الأسد وهو برج بقى مش عايضة أقولكم.. نيعا!!!!!!!!!!!!!!!!!!!!!!)!. وقامت عاملة بأيديها كدا كأنها بتزار!.. أيوة أيوة.. والعصفورة صوصو والقطة نونو وليله كبيرة أوي حضرتك.. بس هو لو لا قدر الله كان الأستاذ أحمد ماهر برج «الثور» كنت هتعبري عنه إزاي؟.. كنتي هتجري بدماعك ورا مساعد المخرج عشان لابس تيشيرت أحمر؟ ونيجي بقى للفقرة الثانية وهي فقرة المداخلات الهاتفية من جمهور الأستاذ أحمد ماهر في أنحاء الكوكب:

= واحد اتصل قاله (أنا بحبك أوي يا أستاذ أحمد والله)... فأحمد ماهر بدل ما يقوله ربنا يكرمك ولا ربنا يخليك قاله علطول وش : (طب ما بتحضر ليش عروض مسرح ليه، دا أنا ليا جمهور عريض فالمسرح).. الي هو يبحاول يشقظ زباين من المداخلات.

= واحد تاني اتصل بيه قاله: (أستاذ أحمااااااااااااه... أزي حالك يا أستاذ أحماااااااااااه)، فأحمد ماهر قاله الحمد لله.. فقام سأله تاني: (عامل إيه أستاذ أحماااااااااااه).. فأحمد ماهر قاله تمام.. فقاله: (منور الشاشة والله يا أستاذ أحمااااااااااه).. فقاله أحمد ماهر: (ربنا ينورهملك يا رب).. السؤال هنا.. هما إيه بقى الي ينورهمله!!.. هو أي رد وخلص كدا!.

= واحدة تالته بقى اتصلت بيه وعيطت مش عارف ليه!!.. دا ذكرى ميلاده مش وفاته بصي إقفلي واتصلي تاني.

وبعدين بقى المذيعه خدت الأستاذ أحمد ناحية شاشة البلازما وقالتله دي الصفحة بتاعتنا اتفرج بقى على جمهورك وتعليقاته لما عرف إنك معانا النهاردة.. المهم هما عرضوا الصفحة على الشاشة الأليلك إيه بقى.. الأليلك بوستين عن أحمد ماهر فالصفحة واحد جايب ٧ لايكات والتاني جايب ١٣ لايك.. اللي هما أسرة إعداد الحلقة! حاجة مسخرة أقسم بالله.. لا والمذيعه بتظيط بقى وضاحكة على أحمد ماهر ومفهاه إن الفيسبوك كله اتقلب لما عرف إن النهاردة عيد ميلاده!.

بس وبعد كذا بقا الأستاذ أحمد قطع التورته بتاعت عيد ميلاده
بالسيف نسبة إلى مسلسلاته التاريخية المأفورة، وبعدين لقيتهولك
عمال يبصع البلالين اللي مرمية ع الأرض ف الأستديو!

يا إبراهيم

هاتلي المنجنيق مع ع المكتب

أنا فرحان وعاوز أفرقع كل البالالين دي دلوقتي

زراعة النخاع في غير موسمه

النهاردة مكنش يوم عادي، إنه اليوم الي الوزير حدده عشان يجي يفتح فيه وحدة زرع النخاع عندنا في المستشفى، عشان كدا طبقاً لتعليمات المدير روجت ضارب الباطو ومعلق الـ ID ولابس الكروكس الفسفوري ناصع الفسفرة ف رجلي، وبصراحة الحاجة الوحيدة الي كانت بتاعتي من الحاجات دي كلها كانت رجلي، عشان الباطو والـ ID والكروكس الفسفوري طلعت جبتهم الصبح من سكن دكاترة الجراحة، منا مكنتش أعرف إن الوزير جاى، ولا كنت أعرف بردو إن فيه دكتور جراحة بيلبس كروكس فسفورى! إيه الهيافة دي!

المهم بعد ما لبست الزي المفضل عند المسؤولين فـ وزارة الصحة وقعدت أنا وزمائي والأخصائي بتاعنا فإستقبال العظام في انتظار وصول سيادة الوزير، لقيت نائب مدير المستشفى والمسئول عن مكافحة العدوى داخل علينا وهو ماسك علبة بيرسول وعمال يجري بنفسه ورا دبانة وحيدة مخنثة في أرجاء الغرفة عندنا وبيرش

عليها بيرسول بمنتهى العنف!

وبعد ما خلص تلت تربع علبة البيرسول ورشها كلها وإحنا
جوه الأوضة، إحنا اتقلبنا على زهرنا وموتنا، والدبانة فضلت
عايشة عادي، مما أصابه باليأس فشرب الباقي من البيرسول عشان
ينسى وطلع يدور على دكاترة تاني يموتها.

شوية ولقيننا داخل علينا مدير المستشفى، سألنا فيه عمليات
عظام النهاردة، قولنا له لأ مفيش.. قال إزاي!! الوزير ممكن يمر
عالعمليات.. اتصرفوا ودخلوا أي حالة دلوقتي أهو!.. آه والله
طلب مننا الطلب العجيب دا!.. وكأننا مطبقين المرضى وعابنهم
فالدولاب!

وعشان إحنا صعب نروح نكسر مواطن مصري برئ من قدام
المستشفى ونجر جره من رجله ونسجه عالعمليات، روحنا استلفنا
عيان عنده كيس دهني من قسم الجراحة العامة، أهو بدل ما
الكيس الدهني مله لظ ودهني كدا ف نفسه، نثبته إحنا ف جسم
العيان بشرايح ومسامير.

وبعدين قالوا الوزير وصل، فطلعت أشوف، لقيت العمال
بيرشوا معطرات جو بالهبل ف الطرقة اللي في مدخل المستشفى
عشان الوزير لما يدخل يتنعش، ولقيت الكول سيستم اللي
مغطي المستشفى والمفروض بيستخدم ف النداء عال أطباء في حالة
الطوارئ القصوى مشغلين عليه موسيقى هادية ليتهوفن! قال

يعني كدا بقت مستشفى جرايز أناتومي العام! ماكنش ناقص غير
إنهم يفهموا الوزير إننا بنستقبل المرضى عندنا بالبلوتوث!

بس ودخل وزير الصحة وصدق ريحة المعطرات اللي شمها
واقتنع إنها ريحة طرقة المستشفى الطبيعية.. مع إن طرقة المستشفى
فيها حمامات.. يعني لو الناس بتبرز ورد بلدى أكيد مش هتبقى
الريحة حلوة ومعطرة كدا!.... وطلع افتتح وحدة زرع النخاع
ومشي.. قال زرع نخاع قال..هو إحنا عارفين نزرع قمح لما نزرع
نخاع!!..إحنا هنهرج!

= (المدير): الوزير مشي يا جدعان.. يلا شيلو محلول الكريم
كراميل اللي معلقينه للمرضى فالطوارئ.. وهاتولي الكروكس
الفسفوري اللي ف رجل الواد دا عشان بتاعي

تمية بشرية

لو أنت فاكِر نفسك الدنيا مقفلة معاك ومعنداك وبتحاربك أحب أقولك إن فيه نايب عظام زميلنا وصديقنا استلم جديد في المستشفى اسمه شاكر (مقولتش اسمك ثلاثي أهو في الكتاب يا شاكر زي ما وعدتك).. المهم شاكر وهو رايح يقدم جواب الاستلام بتاعه في الإدارة الصحية، دخل أوضة شئون العاملين لقي الموظفين والموظفين عمالين يصوتوا ويلطموا وملمومين حولين موظفة تانية واقعة على الأرض، فراح سأل حد فيهم لو سمحت أنا عاوز أمضي ورقة الاستلام دي، قالوله تمضي إيه الموظفة ماتت أهو.. آه والله.. الموظفة اللي هتسلمه الشغل ماتت وهو داخل!!

شاكر مياأسش.. جاهم تاني يوم.. وخلص ورقة الاستلام وجالنا المستشفى.. في نفس اليوم اللي استلم فيه عندنا، الوزير طلع في التلفزيون وصرح بأن المستشفى بتاعتنا هتتحول لمستشفى أورام متخصصة.. يعني كدا خلاص مبقاش فيها تخصص عظام وهنترمي كلنا ف الشارع.

شاكر برردو مياشش.. قرر يكمل فيها لحد ما تتحول أوراام
وحضر يوم في العمليات معايا.. كان من أغرب الأيام في الدنيا..
العملية المفروض بسيطة واتعملت كتير وتخلص في ساعة زمن..
فضلنا أنا والأخصائي والسينيور شغالين فيها ٥ ساعات.. وفي
الآخر شاكر زهق وسابنا وراح يتغدى.

خلصنا وطلعنا سكن الأطباء عشان ننام بعد يوم طويل.. شاكر
ماكنش عجبه السكن.. قال السكن دا إزاي مفيهوش تلفزيون..
تاني يوم قناة ميكي قفلت!!

الاسم_رباعى: شاكر إبراهيم عبد الحميد كامل

= شاكر بقولك ايه ماتيجى أفرجك على مدير المستشفى كلنا

بنجبه

ما هي نقاطك يا هبة

في ظهر أحد النبشيات الكبيسة في استقبال العظام والي كان فيها حالات بالهبل منذ بدايتها، لدرجة إن فيه حالة دخلتلي مرتين، هي نفس الحالة والله، المرة الأولى لقيت واحد من الأشباح كدا داخل ماشي عادي خالص على رجليه وبيقولي ركبتني بتوجعني بقالها أسبوعين عاوز أعمل «أوشاعة».

قولتله إحنا دلوقتي استقبال طوارئ وإسبوعين مش حالة طوارئ، تعالى بكرة الساعة ٩ الصبح في عيادة العظام بتاعت المستشفى اللي في المبنى الثاني مش هنا، قعد يرطم بالكلام وعاوز يخليني أعمله أشعة بالعافية.

فهتمته تاني، قولتله إحنا هنا طوارئ استقبال وانت حالتك مش طوارئ عشان بقالها إسبوعين فمكانها في العيادة في المبنى الثاني ودا وقتها خلص لأنها بتبتدي ٩ الصبح وبتخلص ١٢.. الساعة دلوقتي ١، فهتيجي بكرة الساعة ٩ وهي عملوك اللي أنت عاوزه.

قالى لأ أنا عاوز أعملها دلوقتي بقا مليش فيه أزميلي ..فقولتله مفيش أشعات يلا اتكل ع الله فيه حالات تانية غيرك مش فاضي للتهريج دا.. فقعد يزعق ويشتم في الدكاترة والمستشفى وبعدين مشي.

بعد نص ساعة تقريبا.. لقيته قالع الجاكت الجلد اللي كان لابسه وسايب التيشيرت اللي تحته وجايب شعره الطويل على جنب كدا مغير تسريحته وداخلي تاني (على أساس إني مش هعرفه بالطريقة دي بقى وسط الزحمة وكدا).. ولقيته بيقل «ركبتى بتوجعني بقالها أسبوع وعاييز أعمل أوشاعة» طبعاً أنا مضايقيش تنكره ومحاوله استعباطه ليا قد ما ضايقني غبائه.. يا بني ما هو «من أسبوع» بردو ماتعتبرش حالة طوارئ!!.. إيه الغباء دا!.. روح وتعالى ٩ الصبح بردو يا غبي.. دا أنت مفيش في ديك مخك رجا.

بجد والله غلب الأستاذ «طارق علام».. الأستاذ طارق بردو كان جايب في برنامجه مرة تقرير عن أصغر مدمن ومجرم في مصر.. عيل عنده ١١ سنة.. المهم هو استضاف الوداد عشان يعمل معا حوار وعمل لغوشة بالفوتوشوب كدا (blurring) على وشه عشان يخيبه ومحدث يتعرف عليه على أساس إنه يحافظ عليه عشان لسة صغير وكدا.. بس ف نفس الوقت ساب وش أبوه اللي جمبه عادي وقال اسمه واسم أبوه وعرف الناس هو منين وأبوه بيشتغل إيه وفي محافظة إيه، وفي سياق الحديث ذكر اسم القرية اللي جنبهم كمان.

المهم وسط تعبي في النبطشية دا كله لقيت اتصال على موبايلى جايلي من الأخصائي بتاع اليوم الدكتور أحمد وفا وقالى إنه اتبلغ إن أنا وهو مطلوبين للتحقيق في الشئون القانونية بتاعت المستشفى.. قعدنا نفكر ونخمن يا ترى إيه الجريمة اللي ارتكبتها!.. ملقناش إجابة!.. فقولته خلاص.. أقفل أنت يا دكتور أحمد أنا هطلعهم دلوقتي قبل ما يخلصوا أشوف عاوزينا ف إيه.. ومتقلقش خالص خير إن شاء الله.

قفلت معاه وطلعت للشئون القانونية.. سلامو عليكو.. هنا الشئون القانونية؟.. قالولى أيوة.. قولتلهم الدكتور أحمد وفا هو السبب حضر تكم وهو المسئول على النبطشية وأنا نايب ومليش أي دخل بأي حاجة.. ابعت هولكو؟

قالولى استنى بس أنت مين؟.. قولتلهم أنا أحمد عاطف نايب عظام ومتحول للتحقيق أنا والأخصائي.. قالولى طيب وفين الأخصائي؟.. قولتلهم الأخصائي الدكتور أحمد وفا بيقولكو هو السبب وهو المسئول على النبطشية وأنا مليش أي دخل بأي حاجة.. قالولى استنى بس وقامو فاتحين ملف كدا ومطلعيني ورقة كبيرة وشكلها مهمة.

وقالولى الدكتور هبة الصيدلانية كاتبة فيكو إنتو الأثنين مذكرة عشان بتمضوا على التذاكر بتاعت عيادة العظام بالاسم ثنائي مش ثلاثي.. طبعا أنا اندهشت جداً!.. قولتلهم الدكتور هبة سابت

المشاكل والعجز الي عندها في الأدوية وتوقيع عبد الله السعيد
لنادى بيراميدز ولعبة الحوت الأزرق وجواز شيرين من تامر
حبيب وضربة جزاء ريال مدريد قدام اليوفي وحولتنا للتحقيق
عشان ما بنمضيش ثلاثي!.. قالولي آه وإن شاء الله هتاخذو جزا.

#بعد أسبوع

= أنت مطلوب للتحقيق تاني أنت والدكتور أحمد وفا.. الدكتورة
هبة كتبت فيكم مذكرة وبتقولكم اسمه حسام حبيب مش تامر..
تامر دا سيناريست

الله يخبريتك يا سهير

ربنا ما يكتب عليكم قريب مريض عاشق للأسئلة الوجودية
أبدأ يا جماعة، في إحدى النبشيات ربنا اختبرني بقريب مريضة
لسه عاملة عملية شرايح ومسامير يومها ومحجوزة وكل دقيقة
ينزلي الاستقبال وأنا عمال أشوف حوادث وكسور ويسألني أسئلة
تفقع المرارة بجد.. حاجات من نوعية «سهير نامت نطفي النور
ولا نسييه؟».. وبعدين يطلعها فوق وشوية تاني والاقية خارجي
من جيب الأسكراب وأنا بجبس حالة ويقول «سهير صحيت
وعطشانة نشرها؟».. قولتله أه شرها هو إحنا معتقلينها شرها!!!!!!

طلع وبعدين شوية ونزلي.. قالي شربناها مية خلاص.. قولتله
تمام.. قالي عايزين نجبلها عصير.. نجبهولها بأيه؟.. قولتله أي
حاجة مش هتفرق.. قالي لا قول رأيك الطبي يا دكتور.. نجبلها
عصير بأيه أكيد هيفرق طبعاً.. استجمعت قوايا الداخلية وقولتله
هاتلها عصير بالخوخ.. وطبعاً دا مش بناءً على رأي الطب.. لا دا
رأيي أنا الشخصي.. أنا اللي بحب الخوخ.

المهم طلع شرهبا الخوخ.. يقعد يتهد بقى؟.. لأ طبعاً.. نزلي تاني وأنا بشوف حادثة على ترولي لقيته مطلع راسه من تحت الترولي وبيقولي: «يا دكتور».. قولتله نعم.. قالي «كراوية ولا حلبة؟».. قولتله كراوية.. مع إنى أقسم بالله ما أعرف الكراوية ولا كلتها ف مرة.. شوية ونزلي تاني «دكتور.. لون البول فالقسطرة أصفر».. قولتله أمال أنت عاوزه إيه يا محمد؟.. قالي أنا معرفش أنا جيت أقولك بس.. قولتله عادي يا محمد متخفش أطلع.. البول الأصفر فالقسطرة خير.

وطلع المرادي بقى وغاب فترة ولقيته نازلي الساعة ثمانية بليل وبيقولي حرفياً بالنص كدا: «دكتور سهير جعانة نأكلها ولا نستنى لما تقسي».. قولتله اسمها تطلع ريح يا محمد أفاظك.. وبعدين متخفش يا محمد أكلها إحنا مش محتاجين الريح فحاجة... دي بتبقى مهمة في عمليات الولادة والجراحة بس... أطلع أكلها وابتدى بحاجات خفيفة كدا.. فقالي: «مع احترامي لكلام سيادتك بس أنا هستنى الريح أضمن يا دكتور.. مش هتموت ما لجوع يعني».. قولتله ماشي ومارضيتش أدخل معاه في جدال عشان مكنتش قادر.

وطلع فوق وبعد ساعة لقيته داخل عليا بكيس سوبر ماركت مليون حاجات.. عرفت إن كدا سهير الحمد لله فست.. وقام مطلعلي حاجتين بيقولي «أأكلها البسكوت دا ولا دا يا دكتور؟» أنا اللي نقطني بقى المرادي مش السؤال.. اللي نقطني إن الأثنين كانوا ويفر.. واحد شمعدان والتاني لمبادا باين.. اللي هو تقريبا مفيش فرق بينهم إلا

الكيس.. بس أنا استجمعت قوايا الداخلية بردو كالعادة وابتسمت وشاورته على واحد فيهم يأكلوها عشان أخلص.. قالي وجبتها زبادي كمان.. قولته زي الفل أوي يا محمد اطلع أكلها بقى.

وطلع محمد وسابني ومنزلش خالص الحمد لله.. وفضلت أكشف على حالات وحوادث لحد ما توفيت إكلينيكاً على الساعة اتنين ونص بليل كدا والدنيا هديت خالص وبقت زي الفل.. فقولت انتهزها فرصة بقى واطلع أريجلي ساعتين عشان النبوشية ٢٤ ساعة وأنا من ٨ الصبح متدمر.. طلعت سكن الأطباء ويدوب حطيت راسي عالمخدة روحت فالنوم مالتعب.. لقيت باب السكن بيتفتح عليا وواحد طويل فالضلمة عالباب بيقول الدكتور أحمد عاطف هنا؟.. قولته أيوة مين !!!!.... قالي أنا محمد أخو سهير وراح مشغل النور وقايلي «أنا نزلتك تحت الاستقبال قالولي طلع فالسكن... ينفع نأكلها فراخ دلوقتي بقى يا دكتور؟».

فسيتي واستريحتي يا سهير!

فسيتي واستريحتي يا حبيبتى!

واوا

مرة في يوم كنت قاعد أنا وزميلي محمد التلاوي ومعانا بقى
السينيور الكبير بتاعنا الدكتور أحمد كمال القائد الأعلى للنبطشية
والي معلمنا كل حاجة جديدة في عالم العظام، المهم دخلنا راجل
عنده كسر بسيط كدا في آخر عقلة في صوباع إيده، المهم السييور
أحمد كمال شاف الأشعة وقرر إننا هنتبته الكسر بسن سرنجة،
ودى طريقة شائعة بتثبت بيها النوع دا من الكسور.

فالزميل محمد التلاوي الي كان معانا في النبطشية قال لكمال أنا
عاوز أعملها معملتهاش قبل كدا، فالسينيور أحمد كمال تقمص
دور المعلم رشدان بتاع سحالف النينجا وقال للتلاوي: (تعالى
أعملها وأنا هقف جنبك) لا وقالهاله بطبقة صوت أوفر جداً،
تحسسك إنه هيقف جنبه في محتته مثلاً ولا حاجة، لدرجة إني كنت
عاوز وهما بيتكلموا أعملهم ببؤي الموسيقى التصويرية بتاعت
سوق العصر من كتر ما هما أوفر، دا في الأول والآخر سن سرنجة
يا جدعان، ليه نكبر الموضوع كدا!

لوحدى؁ شوىة وألقىك مىن بقى؁ ألقىك شاكى داخل علىا
أوضة العظام وهو بقولى: «ألقى.. السى الكبىرة الذى كنا بنعملها
العملىة إمارح بىموى فوق»

الله ىخرىبىىك أنى اىه الذى جابك!

أنا مش قولىك ألقى فى البىى ملىجىش خالص واحنا هنمضىبك!

الوهاب بيتخانق مع رضا مدبولي والمرافقين للحالتين ماسكين ف بعض عشان السرير اللي جنب الشباك.. فتعالى اتفضل اطلع حل المشكلة.

طبعاً أنا برودو مصدقتش إن ممكن أتئين مرضى ناضجين كل واحد فيه اللي مكفيه يتخانقوا على سبب كدا!.. يعني سليمان عبد الوهاب دارجله مكسورة ومحجوز عشان هيعمل عملية ف رجليه.. ورضا مدبولي محجوز عشان عنده كسر في دراعه ومحتاج شرايح ومسامير.. يعني الأثنين المفروض عندهم أسباب كافية جداً إنهم يذهبوا في الحياة الدنيا وملذاتها وشهواتها والسرير اللي جنب الشباك!.. بس بعد حلفان مس روحية قولت لازم أطلع أشوف إيه اللي بيحصل بالظبط.. عشان كدا قولتلها اطلعي إنت يا مس وقوليلهم الدكتور طالع ورايا أهو بالخرزانة.. أنا جايلهم بقى أشوف إيه لعب العيال دا.

خمس دقائق بعد ما كشفت على حالة طوارئ كانت معايا.. طلعت بقى فوق الدور الرابع ولقيت فعلاً زي ما المس حكيتلي بالظبط.. سليمان عبد الوهاب عمال يشتم ف رضا مدبولي.. ومدبولي عمال يشتم ف عبد الوهاب.. والمرافق اللي مع عبد الوهاب عمال يشتم ف المرافق اللي مع مدبولي والمرافق اللي مع مدبولي عمال يهزأ ف المرافق اللي مع عبد الوهاب وهيصة جامدة جداً!!!!!!

دخلت الأوضة قمت مزعق فيهم بقى.. وطلبت من المرافقين

الي معاهم يطلعوا بره لحد مبقاش في الأوضة غيري أنا وسليمان
ورضا ومس روحية.. ابتسمت ابتسامة الدكتور مجدي يعقوب
بتاعت الإعلانات دي ليهم هما الأثنين على أساس ابدأ نقاش ملئ
بالود والحنان معاهم ونسمو بخلافتنا ل منطقة جميلة وقولتلهم إيه
المشكلة بقى فيه إيه؟

رد عليا سليمان عبد الوهاب وقالي :إحنا امبارح كنا في أوضة
تانية يا دكتور ولما الأوضة دي فضيت النهاردة.. التمريض قالنا
يلا تعالو اتقلوا أوضة ١٢.. مينفعش أبقى أنا محجوز قبله يا
دكتور والأستاذ دا (يقصد مدبولي) يجي يقعدلى جنب الشباك ع
النيل وأنا لأ.

= رضا مدبولي: هو إيه الي محجوز قبله.. أنا الي اتنقلت أوضة
١٢ الأول واخترت السرير دا خلاص بقى بتاعي

- سليمان عبد الوهاب: يا سلام.. هو الي اتكسر يوم ١٤ ف
الشهر زي الي اتكسر يوم ١٣ ؟

= رضا مدبولي: أهو عافية بقى إذا كان عاجبك.. ورحمة أمي ما
قايم منع السرير إلا على جثتي

- أنا: يا جماعة اهدوا إنتوا كبار مينفعش كدا!

= عبد الوهاب: يا دكتور حتى بالنسبة لحالتي أنا عندي كسر
في رجلي.. هو في إيده.. يعني هو سهل يتحرك ويقوم من السرير

يتمشى يشرب سجارة وأنا لأ.. أنا محتاج أبقى جنب الشباك أغير جو.. أشرب سوجارة.. أبص منه.. أي حاجة تسلينى يا دكتور.

- أنا: تشرب إيه!.. إنتو بتشربوا سجاير في المستشفى!!!

= عبد الوهاب: ما كله بيشرب يا دكتور وبعدين مش دي مشكلتنا دلوقتي.

- أنا: خلاص يا رضا الراجل بيقولك مكسور في رجله ومش قادر يتحرك ومحتاج الشباك.

= مدبولي: وأنا مكسور في إيدي ومبقدرش أهوي بأيدي من الحر ومحتاج الشباك بقى.

- أنا: هوفين المراوح؟

= مس روية: المدير لمها كلها الأسبوع اللي فات.. يقول عهدة وغلط نسيها في أوض المرضى.

- أنا: طب يا رضا.. بلاش عشان رجله.. عشان أنت الكبير يا أخي واعتبر دا أخوك الصغير وشيطان في الشباك.

= مدبولي: مهو عشان أنا الكبير عيب أوى لما عيل صغير زي دا يقومني من فرشتي.

- عبد الوهاب: أهو أنت اللي عيل صغير أنت وأهلك واللي جابوك.

= مدبولي: تصدق إنك راجل ما تربتش.

- عبد الوهاب: وأنت راجل معندكش ريحة الدم.

= أنا: هو بجد فين المراوح يا مس؟

- مس روحية: يا دكتور قولتلك المدير لها الأسبوع الي فات..
بيقول عهدة وغلط نسيها في أوض المرضى.

= أنا: هي مش المرواح دي المفروض جاية المستشفى عشان
المرضى أصلاً!

- مس روحية: أيوة

= مدبولي: لو سمحت يا دكتور أنت شايف أهو قلة أدبه.. لو
سمحت طلعه من الأوضة.

- عبد الوهاب: هو مين دا اللي يطلع من الأوضة... *صوت
غير مستحب يصدر من الأنف*.. أنا جاي قبلك المستشفى أنت
أهبل ولا إيه!

وابتدت تصدر شتايم بالأب والأم والأخ والأخت والأهل
والأقارب والأحباب والموضوع اشتعل وصوتي مبقاش مسموع
ودخل المرافقين وشاركو في الكرنفال السافل الجميل ومس روحية
همست ف ودني قالتلي يلا بينا يا دكتور عشان هنعرض دلوقتي.

طلعت طبعاً اتصلت بالأمن طلوعوا من تحت ليهم وخليتهم
ينتقلوا من الأوضة اللي ع النيل للأوضة اللي كانوا فيها الأول

وقتلهم لو حصل مشكلة من حد تاني هكتبله على خروج إجباري من المستشفى لعدم اتباع التعليمات.. هو مفيش حاجة اسمها كدا بس أنا ألفتها عشان أخليهم يبطلوا تفاهات وخرافات أطفال الحضانة دي.. بس ونزلت بعد ما خليت مس ميادة رئيسة التمريض تقف تكتب أسامي أي حد يتكلم ف الدورع السبورة لحد أما أرجع .

= الحق يا دكتور

- فيه إيه تاني يا مس روحية !

= عبد الوهاب قال مدبولي يلا يا أبو مناخير كبيرة ومدبولي عمال يعيط

كاس العالم

عمري ما هنسى أبداً اليوم الي مصر اتأهلت فيه لكاس العالم روسيا ٢٠١٨، يوم ماتش الكونغو وضربة جزاء صلاح الي في آخر ثانية في الماتش الي سجل منها هدف وأهلنا لكاس العالم بعد سنين طويلة وعذاب.

عمري ما هنسى اليوم دا بجد ولا فرحته، وخصوصاً إني كنت نبطشي يومها وفي المستشفى وطلعت الكافيتريا بتاعت المستشفى لقيت مفيهاش حطة الواحد يعرف يحط رجله فيها، مليانة على آخرها دكاترة كبار وصغيرين وتمريض وأهالي وقراب مرضى محجوزين في المستشفى، حتى المرضى، فيه والله ناس محجوزة كانت عاملة عمليات عظام في رجليها لقيتها قاعدة على كراسي متحركة بتابع معنا الماتش.

كان يوم اتجمع فيه كل المصريين على هدف واحد، والحمد لله ربنا جعل محمد صلاح سبب إنه يفرح كل الناس دي ويفك

النحس وتأهل بعد أكثر من ٢٨ سنة، بس عارفين، أنا بحثت في موضوع نحس مصر وتصفيات كأس العالم اللي إحنا عمالين نموت نفسنا فيها وعليها دي، ولقيت إن الموضوع مش نحس، لأ مرقعة، ومش مرقعة عادية كدا، لأ دا إحنا عدينا براميل بحر المرقعة كمان.

يعني جدير بالذكر إننا مع بدايات كأس العالم وبالنظام القديم اللي كانت التصفيات فيه بتضم منتخبات قارات مختلفة مش أفريقية بس، إحنا اعتذرنا كتبيبيير أوي عن المشاركة في التصفيات المؤهلة لكأس العالم لأسباب مختلفة ومتنوعة، وجدير بالذكر أكثر إن كأس العالم ١٩٥٠ في البرازيل، مصر اعتذرت عن التصفيات لسبب عجيب جداً، اعتذرت خوفاً من عناء السفر إلى أمريكا الجنوبية!.. آه والله.. يعني بالعربي كدا مصر رفضت تشارك في التصفيات عشان قالت «فاكس كدا كدا لو اتأهلت مش هروح.. البرازيل بعيدة يا عم».

وجدير بالذكر أكثر وأكثر وأكثر، إن بردو في كأس العالم ١٩٣٨ في فرنسا، مصر رفضت تشارك في التصفيات النهائية، ليه بقى؟ لأن مواعيد الماتشات بتاعت التصفيات ماكتش ملائها!

وكأس العالم في تشيلي ١٩٦٢.. التصفيات بتاعتنا كانت عبارة عن ماتش واحد بس، ماتش مع السودان، اللي هيكسبه هيتأهل لكأس العالم علطول في تشيلي، يقوم إيه بقى.. يقوم المنتخبين

الأثنين يعتذروا عن الماتش عشان ميعاد الرياح الموسمية.. آه والله العظيم.. عشان الرياح الموسمية! (: (:

- اسمعوا بقى الثقيلة.. كاس العالم في أوروغواي ١٩٣٠..
الفيفا قالت لمصر تعالي شاركي في كاس العالم من غير تصفيات يا مصر.. بلوشي كدا يعني.. والحمد لله مصر ماكنش وراها حاجة وقتها والمواعيد كانت مناسباها والشمس ماكنتش مغيمة ولا الرياح كانت موسمية ولا كان فيه موسم صيد فراشات ولا أي حاجة مهمة.. فمصر وافقت أخيراً أنها تروح كاس العالم... بس مروحناش بردو.. عارفين ليه؟.. منتخب مصر اتأخر على الباخرة اللي بتنقل المنتخبات لأوروغواي فالباخرة مشيت وسابتهم (: (: (:
.... متخيلين!

تاريخ طويل حافل بالمرقعة ♥♥♥

مش موضوع نحس لأ

The Minions

في بداية شهر مارس، جه الميعاد السنوي اللي بيستلم فيه دكاترة الامتياز الجداد من كل جامعات مصر شغلهم في المستشفيات، ويبدأو رحلتهم لأول مرة بالاحتكاك مع الواقع الطبي الجميل بتاعنا، وأول ما استلموا في المستشفى عندنا كنت علطول من أول الناس اللي قعدت معاهم أنصحهم شوية نصايح كدا مهمة جداً لازم يخلوا بالهم منها، طبعاً دا مش عشان خاطر مصلحتهم ومستقبلهم، أنا بس اللي بحب أنصح الصراحة، أجواء النصح دي عارفينها، بحب الدور بتاع الفنان رشوان توفيق دا أوي.. المهم:

= أول نصيحة.. انسوا دكاترة الامتياز اللي شوفتوهم في لحظات حرجة.. انسوا خالص دكاترة الامتياز بتوع جرايز أناتومي بردو.. اتفرجوا بقى على كرتون minions.. هو دافرة الامتياز في مصر.

= ثاني نصيحة وأهم نصيحة.. بلاش تلبسوا بالطو أبيض.. ملوش لازمة جو «جايلكو يا شوية مجدي يعاقب» دا.. أنا عارف

إنكو بتبقو فرحانين بيه في الأول.. بس بلاش ثم بلاش ثم بلاش.. لأن وقت أي خناقة.. اللي لابس بالطو أبيض هو اللي بيتضرب.. بجد مش بهزر.. حتى لو المشكلة ملهاش علاقة بالدكاترة أصلاً.. بس هو كدا.. اللي لابس بالطو أبيض يتضرب الأول وبعد كدا نشوف إيه المشكلة.. فحافظاً على سلامتك كطيب امتياز بلاش بالطو.. عندك حاجة عملية جداً ومريحة اسمها اسكرابات.. البسها.. وخصوصاً الكحلي.. يعني بلاش تلبسلي أخضر وأزرق ولبني.. بلاش الألوان دي.. الكحلي أشيك وأجمل ونفس لون اليونيفورم بتاع شركة «كوبن سيرفس للنظافة» اللي ماسكة أغلب المستشفيات.. عشان وقت الخناقة تعمل نفسك بتنصف العنكبوت مالسقف واسأل على المقشة وأطلع اجري.. متستنهاش.. لأن مفيش مقشات فالمستشفى.

= تالت نصيحة.. هتلاقي كل الدفعة في نفس الوقت بتفكر تسافر ألمانيا بعد الامتياز.. وعمالة بتذاكر ألماني وكل جروب يجمع نفسه ويروح يتفق مع مدرس ألماني عشان يشرحلهم ويجتازوا امتحان اللغة ويسافروا.. بيبقى موسم غسل لمدرسين الألماني بصراحة.. أحجزوا معاهم مفيش مشكلة.. مش هنقطع عيش حد.. بس خليك عارف إن ألمانيا مابتلمش.. ماشى.. مش اتجاه المرج هو.

= النصيحة الرابعة والأخيرة ودي مهمة جداً.. حافظ على نفسك وصحتك وأنت بتشتغل.. لأن لو مت ولا جراك حاجة.. إنتو عارفين الحاجة الوحيدة اللي هتعملها وزارة الصحة.. هيروحو

مشطيين عليك فالدفتر فالإنصراف.. فتخلي بالك على نفسك ...
لأن مثلاً وأنت لسة بتتعلم سهل أوي تشك نفسك.. ومش هنسى
أبدأ واحد صاحبي وهو بيخيط مريض كبير فالسن راح شاكك
نفسه.. فسأل المريض قاله عندك أمراض؟.. قاله: آه.. عندي فيرس
سى.. فصاحبي دا اتصدم طبعاً وكمل الخياطة وهو مصدوم فشك
نفسه تاني عشان مكنش مركز.. وأكثب طول اليوم وفضل يتخيل
الفيروس وهو راكب مكنة صيني وعمال يخمس فدمه.. وراح يعمل
تحليل يومها بعد ما خلصنا عشان يعرف فيرس سي جاله ولا لأ..
قالوله لازم تستنى كام شهر وبعد كدا تعمل التحليل.. لأن لو عملت
دلوقتي مش هيظهر حاجة.. فطبعاً كان مضطر يستنى على أعصابه
حوالي ست شهور عشان يعمل التحليل ويتطمئن.. ودا خلاه يحلف
إنه مش هيخيط حالات تاني ولا يقف في استقبال الجراحة تاني..
وعشان هو كان موسوس جداً مقدرش ينسى الشبكة طول الست
شهور وجاتله حالة شديدة من الإحباط ومبقاش يسرح شعره..
وبعد كام شهر عمل تحليل الفيروس.. فلقاه سلبي الحمد لله.. فرجعله
التفأول تاني وقرر يرجع استقبال الجراحة ويخيط بس وهو واخذ
باله المرادي.. فراح شاكك نفسه تاني بردو.. واضطر يستنى ست
شهور تاني عشان يحلل ويتطمئن... كنت خلصت أنا فيهم امتياز
بقى وهو خلص تسع ألبومات حزينة لمصطفى كامل.

وفي النهاية أحب أوجه رسالة بقى للمرضى وقرايهم اللي بيجو
المستشفى.. هتلاقوا دكتور فرحان جداً وهو بيعمل حاجات تافهة

بالنسبالك.. يعني فرحان وهو بيدي حقنة.. وهو بيركب كانيولا..
وهو بيقطع البلاستر ويلزقه.. دا بيبقى دكتور امتياز جديد..
تطببوا عليه وتبوسوه ومحدث يزعله من فضلكم ♥

المخترعين

بسم الله الرحمن الرحيم.. هحكيلكو حاجتين شوفتهم في التلفزيون أثاروا في قرار غير مهم جداً خدته في حياتي:

(١)

شوفت جزء من حلقة برنامج عجيب كدا في قناة المحور المذيعه مستضيفه أتنين في تالته إعدادي وواحد عنده خمس سنين ..هى بتقول إن دول عبقارة بقا في مجال التكنولوجيا ومخترعين روبوت ... المهم الروبوت كان شكله غريب أوي ومعمول بالمكعبات وحالته صعبة ... ولما بدأو يشغلوه قعد يلف حولين نفسه بطريقة هبله جداً ... فالواد المخترع قالها هو المفروض بيشتغل عادى بس إضاءة البرنامج مضيقاه وإحنا معانا فيديو مصورينه وهو بيشتغل كويس! المهم بغض النظر عن كل دا.. في الآخر سألتهم قائلهم: (طيب جميل أنتوا اخترعتوا الروبوت دا.. بس اخترعتوه ليه بقا؟ يعني إيه التطبيقات العملية الي ممكن نستخدمه فيها في الحياة؟).

(٢)

شوفت بردو برنامج على صدى البلد المذيعه مستضيفه أم
وابنها عنده بتاع ٣ سنين والبانرع الشاشة مكتوب تحت الطفل
الي لسه مفسسش من البيضة دا «المخترع / مش عارف محمد مين
كدا!!.. لا والمذيعه بتسأل الأم بتقولها اكتشفتي مين إن محمد ابنك
عقبري؟.. قائلها: لاحظت الموضوع دا عشان كل شوية ألاقه
مبيلعبش باللعب الي بجبهاله وبيكسرها ويفككها فشكيت إنه
بيحاول يخترع.. روحت بيه لدكتور ذكاء (معرفش إيه دكتور الذكاء
دا بس هي بتقول إنها راحتله) فعمله اختبار ذكاء وقالها ابنك يا
مدام ذكي جداً وكلها ٤ سنين بالظبط وهيبقى عنده القدرة إنه
يدي محاضرات في أكبر جامعات العالم.

المذيعه قائلها طب هو اخترع حاجة؟... فالأم قائلها كتييسير
..المذيعه قائلها زي إيه.. قائلها محمد ماشاء الله اخترع عربية
بتطير.. بس هي ف البيت نسيت أجيها.. فالمذيعه قائلها ما شاء
الله إزاي... قائلها جاب عربية لعبة وقالي أنا عاوز طيارة هيلكوبتر
يا ماما.. جبته طيارة هيلكوبتر.. فلقيته من نفسه من غير ما حد
يقوله راح مكسر المروحة بتاعتها ومركبها ف العربية وبقت بتطير!
فالمذيعه قائلها ما شاء الله وإيه كمان... ف قعدت بقى الأم
تحكيلها عن اختراعات بنت **** ملهاش أي ستين لازمة زي
كوباية بد غطا.. وبتاعة مدورة كدا بتقول إنها بتتعلق على الباب
وتعمل صوت لما الباب يفتح.. وحاجات عجيبه جداااا.

المهم أحسن حاجة بقى إن في آخر الفقرة بردو المذيعه بتسأل
الأم بكل جدية بتقولها: «فيه مشاكل بتقابلك ف التعامل مع طفل
بالعبرية دي؟».. قامت الأم قالتها: «آه.. المشكلة بس بخاف اسيبه
لو حده بالمفكات وأدوات الإختراع عشان بيحطها ف بؤه.. فلازم
أبقى جنبه».

هو عبقرى جدا بس بيحط الاختراعات ف بؤه

كفاية يا مصر أبوس شعر مناخيك كفاية

دا بوظ الطيارة اللي بتطير عشان يخترع عربية بتطير! هاهah

اسود

المهم الخلقين اللي أنا شوفتهم دول للمخترعين ف التلفزيون
وغيرهم كثير من البلاوي السوده للمخترعين المصريين اللي
بنشوفهم كلنا كل يوم على الفيسبوك، ادوني شعور بالانسكيورتى
تجاه قدرة أطفالنا وأولادنا إنهم يعملوا حاجة تفيد العالم.

عشان كدا في يوم وأنا قاعد فالاستقبال منهك القوى بعد
نبطشية ٤٨ ساعة ومش قادر بقى لدرجة إن كان على مناخيرى
شوية جيس وحاسس بيهم ومريض قالي عليهم وبالرغم من
كدا مكسل امسحهم.. أصل همسحهم ليه مهو كدا كدا مناخيري
هتتوسخ تاني.. المهم في خضام كل دا دخل عليا الواد ابن مس

بدرية ممرضة الاستقبال .. عيل كدا عنده بتاع ٦ سنين بس يمتلك كتلة مكانية وزمانية بتاعت طفل عنده ١٠ سنين .. أو بمعنى أصح بالبلدي كدا عيل اللهم صلى ع النبي مليون.

المهم لقيته داخل عليا وهو عارفني وواحد عليا من كتر منا مرمي ف الاستقبال ومن كتر ما مس بدرية بتجيبه معاها في الشغل .. المهم لقيته فاكك جهاز الضغط بتاع المستشفى حته حته .. المنفاخ لوحده والوصلة لوحدها والحامل بتاعه لوحده والزئبق لوحده .. حاجة كدا معرفش عملها إزاي .. وجايلي بيه بمنتهى الانشكاح وبيقولي : «بص .. بص عملت إيه» .. وهو مبسوط جداً!

أنا طبعا احترت أرد عليه أقوله إيه .. اشتمه وأهزقه عشان بوظ الجهاز؟ .. ولا أشجعه يمكن فيه بذرة مخترع ولما يكبر ويبقى عالم كبير ويطور جهاز الضغط يبقى يفتكرني إني أول واحد شجعته وخذت بأيده؟ .. بس لا .. دا مش منظر عالم دا شكله عيل أهطل ... بس لا بردو ... ما كل العلماء والمخترعين يبقى شكلهم أهطل في بدايتهم .. وعادي أينشتاين مكنش منظره عالم ... حاجة تحير والله طب ما هو أنا لو شجعته ممكن بردو يكمل ف الموضوع دا وألاقيه طالع في التلفزيون زيه زي العيال اللي بترفع الضغط اللي أنا حكيتركو عنهم في الأول ويقرفنا ويعرنا ويجبلنا الحصبة .. ولا أشتمه وخلاص .. وأنا والله عايز اشتمه أصلا كدا كدا من غير حاجة .. ولا أشجعه؟

عشان كدا ريحت دماغى ولا شجعته ولا شتمته.. قولتله: «زي
الفل روح وريها لأمك».. وهما دقيقتين بالظبط مسافة ما رحلها
وسمعت صوت لطشة قلم على وش طفل تخين ♥

♥ #الحمد لله

♥ # كدا مش هيفتختر حاجة تاني ♥

عزمى وأشجان

دا يا جماعة واحد من أكثر المواقف المحرجة الغريبة اللي اتعرضتلها في المستشفى، في يوم طلعت أمر على الحالات المحجوزة في الدور الرابع، المهم مريت على الحالات وظبطت الدنيا وروحت عند الأسانسير ضغطت على الزرار عشان أنزل، ف الأسانسير كان نازل من الخامس ففتحلي، لقيت رئيس القسم بتاعنا راكب، فقولتله إزيك يا دكتور أسامة وركبت عشان أنزل، وطبعاً الأسانسير واسع جداً فكان معانا ناس تانية كتير، سواء مرضى أو ناس جاية تزور مرضى.

المهم الفترة دي كانت أيام بوستات عزمى وأشجان الكثيرة اللي كنت بعملها في صفحتى على الفيسبوك ، المهم لابس بقى البالطو فوق الأسكراب وشكلي دكتور جداً بقا، وواقف واقفة كلها شموخ، اللي هو تحس إن أنا مدير الأسانسير، طبعاً ما أنا جنبي رئيس القسم بتاعنا محدش قدي، وفجأة اللايلك الدكتور أسامة

رئيس القسم يقول في نص الأسانسير بصوت عالي وبمتهى
الجدية: (أنت مش ناوي تبعد يابنى عن الرقاصة بتاعتك دي بقا
وتريحنا!!)

الدكتور أسامة طبعا قصده على فيفي عبده والبوستات اللي
بكتبها، بس محدش أكيد ف الأسانسير فاهم، عشان كدا الناس
الي ف الأسانسير كلها لقيتهم بيصولي باستغراب واشمئزاز كدا،
الي هو دكتور ومصاحب رقاصة!!! أسفوخس على دي دكاترة!
... وخلاص بقا بقيت بالنسبالم ياسر جلال في مسلسل لحظات
حرجة، أو ف أي مسلسل عامة مش فارقة هو مريب ف كل حالاته.
ولسة بفكر بقى في طريقة أوضح للناس فيها إن الدكتور
أسامة قصده على مسلسل أشجان وعزمي.. لقيته بيكمل ويقول
:(وبعدين مالك بجوزها دا كمان.. دا شكله راجل طيب.. سيبه ف
حاله).. هو قال الجملة دي وراح خارج من الأسانسير ف الدور
التاني وسابني أنزل للأرضي لوحدي مع الناس وهي عماله تبصلي
بإيموشن «الكلاب الي بتضيق عينها»

طب الرقاصة وماشي ... إنما جوزها كمان!

طبعا أنا لو حلفتلكو إنه يقصد بجوزها دا كمال أبورية مش

هتصدقوني

أجمل إحساس في الكون

في نبطشية من نبطشيات رمضان وقبل الفطار بكام ساعة سابني
السينيور بتاعي أحمد كمال وقالي أنا طالع اتفرج على كونج فوباندا
الجزء الثالث في السكن على اللاب، لو احتاجت أي حاجة كلمني.
المشكلة إنه سينيور طويل كدا وله هيبة وميانش عليه خالص
موضوع الكونج فوباندا، بس قولتله ماشي اطلع أنت ولو ميكي
ماوس سأل عليك هبقى أقولك حاضر.. أطلع يا حبيبي.. أطلع.
المهم طلع هو من هنا وشوية لقيت أم وابنها داخلين عليا
الاستقبال.. خير يا ست الكل.. قالتلي الواد وقع على دراعه وهو
يلعب كورة... كشفت ع الواد وطلبتله أشعة.. راح عمل أشعة
ورجع.. بصيت ف الأشعة لقيت فيها كسر.. فقولتلها فيه كسر
وهنجسه وهيقى كويس إن شاء الله.. بس هو يحافظ على نفسه
بس وميلعبش كورة تاني لحد ما يخف واحتياطي بردو ميتفرجش
خالص على أي مسلسلات لـ حسن الرداد.

المهم لقيت قطن حولين دراع الواد وأخذت أول رباط جبس من

اللي جاي حمادة "حرفياً"

قد يأتيك البلاء على هيئة نايب جينيور يرفعك الضغط .. آه والله .. في فترة استلم عندنا فالمستشفى مجموعة من النواب الجداد في قسم العظام، من ضمنهم بقى نايب جينيور معين كدا هو أكيد هيعرف نفسه لما يقرا، محسني إنه مش جاي يستلم شغل في تخصص متعب، لا دا جاي يقضي وقت لطيف فـ المستشفى مش أكثر.

يعني وهو قاعد في النبطشية كل شوية يقوم مصور نفسه ورافع الصورة عالفيس وعلى جروب القسم، مرة تانية فالنبطشية بردو تلاقيه قاعد يتجول في طرقة المستشفى بطريقة عجيبة كدا كأنه مثلاً ماشي في فيديو كليب مش فـ مستشفى خالص! وحجات تانية كثير، النايب دا اسمه حمدي سعد بس أنا هسميه حمادة سعد فـ الفصل دا، أولاً عشان منفضحهوش، وثانياً عشان هو لايق عليه اسم حمادة أكثر.

المهم وأنا قاعد ف العيادة الأسبوع الي فات سمعت صوت
شئ بيترقع عالارض بمتتهى الثقة داخل عليا، ببص لقيت
جزمة متورنشة ماشية عالارض، ببص فوق الجزمة لقيت بنطلون
أبيض مكوي، ببص فوق البنطلون لقيت قميص وجرفته وفوقهم
جاكت جلد بيلمع، ببص فوقهم لقيت دماغ حمادة سعد!

قولتله إيه يا حمادة الي أنت لابسه دا يا حبيبي .. أنت جاي
تستلم جايزة أحسن نايب!! أقلع يا حبيبي الحاجات دي عشان
هنجسس حالات يا بابا.. يلا يا حبيبي ربنا يهديك متفقعنيش.

المهم قلع الجاكت ولبس بالطو وقعد زيه زي أي مطرب مشهور
قاعد في السويت الخاص بتاعه في الفندق.. وفي أثناء الكشف كدا
اتزحمت الأوضة فجأة وبقت مليانة مرضى.. ودا لأن مكنش فيه
أمن على الباب يوميه ينظم الناس.. ف أول ما الدكتور حمادة لقي
الدينا زحمة حواليه.. قام واقف ولقيته بكل حدة وكيوتنس في نفس
الوقت بيقولهم: (لو سمحتوا احترموا خصوصية المرضى).

محدش عبره طبعاً وفضلوا واقفين عادي ولا بصوله أساساً..
قالهم تاني: (لو سمحتوا احترموا خصوصية المرضى).. محدش عبره
بردو.. قمت أنا بقى متخن صوتي ومصرخ فيهم بقا: (احرمو
خصوصية المرضى يعني أطلعوا!!!!!!!!!!!!!!!!!!!!!! بر!!!!!!!!!!!!!!!!!!!!!!... فيه حالة
بتكشا!!!!!!!!!!!!!!!!!!!!!! ف!) ... محدش عبرني!

بالعكس فيه واحدة كانت ماسكة تذكرة كدا زغرтли وقالتلي

The shape of water

واحد زميلي ف النبطشية اسمه يوسف عاشق للأفلام الأجنبي، كل ما النبطشية تهدي بليل الاقيه راح مشغل الأياد بتاعه وفاتح فيلم أجنبي كدا ويقعد يتفرج عليه، المهم مرة لقيته باديء فيلم جديد.

سألته فيلم إيه؟.. قالي دا فيلم the shape of water .. ودا كان عامل ضجة كبيرة لأنه وقتها المفروض كان واخذ أوسكار أحسن فيلم وأوسكار أحسن إخراج، عشان كدا علطول قولت لازم أشوفه معاه، لأنني كنت ناوي أنزله من عالنت وأشوفه ف أقرب فرصة، بس بجدا يا ريتني ما شوفته.. آه والله.

من جهة الإخراج أنا مش هتكلم، هو المخرج رائع طبعاً ومن جهة المؤثرات الصوتية والساوند تراكس بتاعت الفيلم فهي الأفضل في أفلام السنة، فيستاهل بصراحة جائزة أحسن إخراج، بس من جهة إنه أحسن فيلم.. فدا اللي هو أم الاستهبال بقى!!..

من وجهة نظري قصة الفيلم من أتفه وأعبط ما يكون، قصة مملّة،
الأطوار بتاعها اتهرس كثير قبل كدا والأحداث تقليدية مفيهاش أي
جديد.

قصة الفيلم بتدور حولين واحدة ست بتحب سمكة، أو ذكر
سمكة بمعنى أدق، ومش بتحبها اللي هو «الله إيه السمكة الحلوة
دي لما أحطلها أكل».. لا بتحبها حب من بتاع عمر وسلمى دا،
ومش بس كدا، دول بيقيموا مع بعض استغفر الله العظيم علاقات
سمكية كاملة.. حاجة منتهى قلة السفالة والإنحطاط.

وياريت مثلاً فيه مبرر للحب دا ... يعني السمكة أنقذت
حياتها.. أو بتعاملها حلو وطيبة زي فيلم الجميلة والوحش كدا
فالت مع الوقت تحبها... لا ... دا البت أول ما شافت السمكة
حبتها من أول نظرة!!! يعني دا منطقي دا!!! كدا علطول من غير
مبرر!!!

بجد أنا طول الفيلم كان الأستاذ مصطفى شعبان عمال يجي
ف بالي.. حد هيسألني ويقولي طب والأستاذ مصطفى شعبان إيه
علاقته بالفيلم.. هقوله ملهوش علاقة.. بس أنا كده.. لما بتفقع
من حاجة، علطول بيجي ف بالي هو أول واحد.

وكله كوم والشير بتاع الفيلم كوم تاني.. عامل زي الأشرار
بتوع السينما المصرية زمان.. اللي هما مكشرين علطول وأشرار في
المطلق كدا.. طول الوقت بيتكلموا كلام شيرير... ويصوا بصات

شريرة... ويهزرو هزار شرير.. ويتبرزوا براز شرير... الي هو
بيوظ السيفون دا.

يعني الي مستني من الفيلم.. قصة رومانسية.. من وجهة نظري
مش هتلاقي أي قصة أصلاً.. والشخصيات ماكسبتش تعاطفي
طول الفيلم.. حتى في آخر الفيلم لما السمكة خدلتهما طلقتين في
صدرها.. من كتر ملل الفيلم متأثرتش خالص.. كان كل تفكيرى
في حاجات تافهة تانية زي «ما السمكة تجبت أهية.. أمال إيه بقى
ليه الفنان محمد كريم محدش بيحبه؟».. وحاجات من دي كدا..

أوبن بوفيه

عيادة العظام عندنا فالمستشفى من أكثر العيادات الجميلة المزدهمة دائماً بالركاب، تلاقي واقفلك على باب العيادة الصبح كدا يجي عشروميت واحد، منهم أربعة أو خمسة بالكثير مرضى بجد والباقي بقى جاي مخصوص قاطع تذكرة بجنيه عشان ياخذ مرهم مسكن!.. مش فاهم إيه سر حب المصريين فالمرهم! لا وفيه ناس بتيجي قاطعة تذكرتين وتلاتة وعاوزاني اكتبها مرهم أو أتنين على كل تذكرة.. اللي هو لو سمحت يا دكتور اتفضل امضيلنا على صفقة المراهم دي عشان نصرها!

المشكلة الفعلية بقى إنهم وهما مستنين دورهم بيعملوا مشاكل وخناقات كتير، ودي طبيعة سكان المنطقة اللي حوالين المستشفى، معندهم مش مبدأ الطابور ودورك والكلام الفارغ دا... لأ... دول ماشيين بمبدأ البقاء للي «علوضعه» عشان كدا وأنا قاعد جوه فالعيادة بقى سامع شلايتهم وكيعانهم ف وش بعض وف

مناطقهم المعينة، دا غير الشتايم والخناقات، ومرة فكرت أقول
للممرض اللي معايا فالعيادة إنه يطلع ينظمهم بره، من ساعتها
مارجعش، تقريبا قتلوه.. بس ملناش دعوة.

المهم في أحد الأيام بعيادة العظام بالمستشفى ووسط الزحمة
الرهيبية من الحالات، دخلت ست - خمسة أمواه ف عين العدو -
طول بعرض بارتفاع، كانت شبه الأستاذة سميحة قليوب جدا،
شكلاً وجبروتاً، حاجة كدا أول ما تشوفها تديك إحساس إنك
أنت اللي عيان مش هي.

المهم دخلت وهي ماسكة عدد كبير من التذاكر ف أيديها،
وقامت مدياني تذكرة وقالتلي رجلي بتوجعني وعايضة مرهم
ومسكن ومضاد حيوي، أنا قولتلها ثانية واحدي تذكرة رمد!!
قالتلي لا مؤاخذه يا أستاذ وقامت مدياني كل التذاكر اللي معاها
وقالتلي طلع العظام.

قعدت أفر فالتذاكر.. لقيت بقا تذكرة جلدية.. وأثنين باطنة..
وواحدة أنف وأذن.. وتلاتة نسا.. وبلاوي سودا!!.. أنا قولت دي
أكيد الأدمن بتاع جروب «كل يوم رحلة جديدة» وجايبة الجروب
كله وجايين يكشفوا.. المهم شوفتها وماقتنعش بشكوتها بس كتبتلها
العلاج وخلاص عشان كنت نبطشي قبلها ومفيش حيل للمناهدة.
نص ساعة ولقيتها دخلاي تاني وهي منفعلة وبتقولي مفيش
مرهم مسكن تحت فالصيدلية أنتو بتودوه فين!!.. ورجعتلي

قادر.. بس سبحان من بعثني هدية من السما.. لمحت حاجة من بعيد قاعدة كدا.. دقت النظر فيها لقيتها هو فعلا مش هزار.. فقومت ماسك التذكرة من سميحة أيوب وقولتها إنتي آخر كلام عايزة حقتين؟.. قالتلي أيوة اكتبلي أي حقتين.. قولتها وأكدت عليها مش ناوية ترجعي ف كلامك؟.. قالتلي لا أقسم بالله ما ماشية إلا لما أخذهم.

قولتها تمام.. بصي شايفة الدكتور اللي هناك دا.. وروحت مشاورها على شاكر اللي لمحته قاعد في الاستقبال من بعيد.. قولتها الدكتور شاكر دا إيده تتلف ف حرير يا حاجة.. يما ريح مرضى وناس سليمة ويتم أسر وهجر قرى بعلاجه والله.. روحيله بقى هيكتبك على الحقتين.. فخطفت التذكرة مني وراحت جارية عليه.

الله يرحمك يا حاجة

دا شاكر مش هيخلي فيكي حاجة الورثة يدفنوها

من الذي ثقب الاوزون؟

في يوم دخل عليا راجل مكسور ومعاه واحد صاحبه، الراجل المكسور كان ساكت مبيتكلمش مبيقولش الـ «آه» حتى بخلاف صديقه الي كان جاي معاها تماما، كان بالبع راديو.

كان بيتكلم بسرعة بلكنة هجينة توحى بأصول ريفية أو تقدرُوا تقولوا إنه كان بيتكلم بنفس طريقة الكابتن رضا عبد العال بالظبط، وسبحان الله كلامه كان نفس الهري بردو.

المهم عملت أشعة لصاحبه وطلع عنده كسر في الرسغ، قعدته ع الشيزلونج ولسه بيتدي الجبس لقيت الكابتن رضا عبد العال بيقول «الأوضة هنا حر أوي أدكتور إيه دا» قولتله التكييف جنبك شغله لسه مصلحينه.

قام ضاغط على زرار التكييف وقالي وهو بيضغط: (تعرف يا دكتور.. شركات التكييف دي هي الي خرمت الأوزون).. فأنا قولتله يا سلام!.. قالي: (أيوة يا دكتور.. أنا قرئت كداع النت ...

الشركات دي خرمت الأوزون عشان تعمل انجباس حراري فالدنيا تبقى حر فالناس تحتاج للتكييف).. قولتله اسمه احتباس.. فقالي أيوة منا قولت كدا.. فأنا قولتله والأوزون بقى بيتخرم إزاي؟ قالي بييجيو أجهزة معينة كدا ويشغلوها تحت الأوزون لعدد معين من الشهور فيتخرم.

طبعاً إنتو زي ما تعرفوا عني، بلقط دماغ الي قدامي علطول، وأنا استتجت إن دماغه مليانه مربى بالعجوة، ويعمل شير للمعجزات الفوتوشوب والخيارة الي مكتوب عليها بسن حرف السكينة سبحانه الله والحاجات الديب ويب دي كلها، عشان كدا زي منا معودكم، خدته على قد عقله خالص علشان أريح دماغي، الي هو شركات التكييف هي الي خرمت الأوزون.. آه يا حبيبي طبعاً.. الزمالك هو نادي القرن الحقيقي.. أكيد يا خويا.. نيد ستارك راجع ف الجزء التامن.. يا مسهل الحال يا رب.

المهم الراجل دا وأنا بجبس صاحبه طول الوقت عمال يهري وأنا ساكت ومنفض وصاحبه ساكت ومع ذلك دا شغال عادي جداً لحد ما جابلنا صداع والله، في خمس دقائق بس مدة الجبس دخلنا في موضوع البنزين وإزاي الدولة ممكن تعمل عربيات تمشي بالمية بملح، وموضوع جواز القرايب وحكالي إن جواز القرايب دا عكس ما الطب يقول، أحلى جواز، وياريتيه كان اتجوز شياء بنت خالته كانت شرياه، ودخلنا في مواضيع أنيل من الأوزون بمراحل.

على جلدها بس وبينهش فيها من جواتها.. المهم بعد فترة صحي
الصبح بيدخل المزرعة بتاعته لقي نص البقر واقع الأرض ميت..
هو كان عنده السكر يا دكتور فمات حملش الصدمة فداخ وجاتله
غيوبة سكر وقع الأرض إيده اتكسرت.. قعد إسبوعين بس ف
الجبس.. فليه بقى شهر ونص!!»

**** عاجل: انتحار طبيب عظام عن طريق شنق نفسه بأربطة
الجبس.. وتقرير الطب الشرعي المبدئي يؤكد: مات مفقوعا**

في دقيقتين

ياخذ الكبد وياخذ العين

في ليل أحد نبطشيات الشتاء القارصة، كان معانا في العمليات عملية طوارئ لكسر في ساق راجل عنده بتاع ٤٠ سنة، الكسر كان وحش جداً عشان كدا فضلنا في العمليات يومياً من الساعة ١٢ بليل لحد الساعة اتنين ونص بليل، المهم أنا كنت متعقم في العملية دي أنا والأخصائي والنايب الجينيور الجديد الشهر حمادة سعد.

إحنا كنا معقمين حمادة معانا في العملية مع إنها مش محتاجة أكثر من اتنين جراحين عشان نعلمه ونخليه يدخل في أجواء عمليات العظام، بس للأسف حمادة جابلنا الضغط، قعد يسأل أثناء العملية أسئلة كثير، طبعاً أنتوا فاكرينها أسئلة طيبة، بس للأسف لأ، كان بيسأل الأخصائي أسئلة زي «حلو أوي البرفن الي حضرتك حاطه دا يا باشا نوعه إيه؟»، «سمعتو ألبوم شيرين الجديد؟ تحفة جداً!!!!»، وأسئلة كثير من الي تفقع دي وإحنا مركزين في العملية عشان كدا

الأخصائي قفش عليه طبعاً بعد كام سؤال من بتوعه وزعقله وقاله ركز في أم العملية إحنا مش جاين نلعب، فمكانش من حمادة سعد إلا إنه سابه من الأخصائي ومن العملية وقعد يكلم الممرضة اللي واقفة معانا... هيشلنا كلنا والله.

وعلى آخر العملية كدا الأخصائي قال لحمادة باعتباره النايب الجينيور وميعملش أي حاجة وملهوش لازمة في العمليات.. فـقاله يلا يا حمادة سيب العملية أنت وروح بسرعة هاتلنا كام ساندوتش كدا نتعشى بيهم عشان أنا ميت من الجوع.. بس ف السريع قبل ما المطاعم تقفل.. ودا طبعاً بعد ما مس أماني ممرضة التعقيم اتصلت بالديلفيري وقالوها إن آخرهم للساعة اتنين ف الديلفيرى.

المهم حمادة جاب ورقة عشان يكتب فيها الطلبات وسألنا عاوزين ساندوتشات إيه؟.. فالأخصائي قال أنا عايز اتنين فول واتنين طعمية.. وأنا قولتله وأنا اتنين فول.. والممرضة اللي كانت معانا مس لبنى طلبت اتنين طعمية، ومس أماني طلبت واحد بابا غنوج وواحد طعمية.. وحمادة قال إنه هياكل ٢ بطاطس بالجبنة الرومي والمودزريلا (سبحان الله، حتى الساندوتشات اللي بياكلها تافهه بردو) وبعدين قالنا عايزين حاجة تانية؟.. قولناله لأروح يلا بسرعة وهنحاسبك لما تيجي.

خمس دقايق وكنا خلصنا العملية وحتينا المريض في أوضة الإفاقة.. ودي أوضة موجودة في العمليات بيتحط فيها المريض

تحت ملاحظة التمريض ودكتور التخدير لحد ما دكتور التخدير
يطمن عليه إنه بقى تمام ويصرح بخروجه من العمليات.

المهم قبل ما الحالة تخرج بقى من العمليات.. أنا خرجت اتصل
بحمادة سعد استعجله بره العمليات عشان الشبكة في العمليات
ما كنتش كويسة، فخارج بقى من العمليات وماشي ف الطريقة
الي قدامها ولا بس الأوفر هيد على راسى وال mask منزله كدا
وباللبس الأخضر بتاع العمليات شكلي مش واضح خالص إني
دكتور العظام، لقيت واحدة قريبة المريض الي كنا بنعمله العملية
ومستنية مع بقية أهله قدام العمليات بتقول لمراته وهي مش عارفة
إني دكتور العظام ولا حد واخذ باله مني: (خلي بالك الدكاترة
الي هنا مش مضمونين.. ممكن يغفلوكو في كلية ولا غدة ولا
حاجة.. بعد العملية قلبي جوزك على بطنه تشوفي فيه جروح ولا
لأ.. الكلية بتبقى ورا مش بتبان عشان كدا سهل تتسرق خليكى
ناصحة)

أيوة أقبليه على بطنه بعد العملية بوظيها مش مهم.. المهم لو لقيت جروح أو

فتحات ورا بيقو سرقوا الكلية

لو ملقتيش يبقى سرقوا الطحال هما كدا كدا بيسرقوا نخلي بالننا يا أم

مجدى يا ختي إحنا أولى بالأعضاء دي

باب العربية قفل على صوباع البنت.. ألحقني أرجوك.. اعمل أي حاجة ممكنة يا دكتور».

قولتلها اهدي إن شاء الله خير وقعدت البنت على الشيزلونج بتاع الكشف وشيلت المنديل من على صوباعها.. البنت أول ما شيلت المنديل قعدت تشد صوباعها مني وتصرخ جامد.. فأنا حاولت اهديها وأقولها ماتخافيش يا عسل ماتخافيش مش هعملك حاجة.. هشوف الواو بس.

بس وسط ما أنا عمال اهدي فيها.. البنت وهي بتعيط فجأة لقيتها عمالة تقول وسط العياط بتاعها: «فين كوكي يا مامي.. فين كوكي».

فماستها على طول قالتلها: «متخافيش يا نودي، كوكي معايا أهو متخافيش».. وراحت فاتحة شنطتها ومطلعة منها سلحفة وحطتها على الشيزلونج بتاع الكشف.. وقالتلها: «كوكي أهوووو، كوكي بيحبك وبيقولك خلي الدكتور يشوف صابعك».. وبعدين مسكت السلحفة وحركتها على الشيزلونج وعملت صوت مصطنع كدا كأن السلحفة هي اللي بتتكلم وقالت: «كيبب كالم بليز نودي... بليز زرز».

البنت طبعاً هدبت شوية وقعدت تططب ع السلحفة اللي محطوطة على الشيزلونج وأنا انتهزت الفرصة دي وشوفت صوباع البنت ولقيته أزرق بسيط كدا وفيه جرح صغيرة بيحجب دم.. حاجة بسيطة الحمد لله خالص... فطمنت مامتها وقولتلها هنعمل أشعة نضمن بس الأول تعالي لما نظهر الجرح دا.. وخدمهم أوضة الجراحة اللي جنبنا وغسلت صوباعها بمحلول ملح وبيتادين وحطيت عليه

شاش وبلاستر وبعدين كتبتلها على أشعة تعملها.. فالمدام قالتلي أنا مش عارفة مكان الأشعة يا دكتور أنا أول مرة أدخل المستشفى دي... بليز ممكن ما تسييناش.

طبعاً أنا أول مرة يتقالي ف حياتي بليز.. عشان كذا روحت معاهم وماسبتهمش لحظة... روحت وريتها المكان اللي هتعمل فيه الأشعة وقعدت خمس دقائق لحد ما الأشعة اتعملت واتطبعت وشوفتها.. والحمد لله مطلعش فيه كسر في صوباعها.. قولتلها زي الفل جت سليمة الحمد لله يا مدام، تعالي نروح أوضة العظام بقى لما اكتبلك العلاج اللي هتمشي عليه.. وروحنا الأوضة وكتبتلها العلاج ولسة هتمشي.. البنت الصغيرة قالت مخضوضة فجأة: «مامي... فين كوكي يا مامي!».

السؤال دا نزل على الست كالصاعقة.. آه صح فين كوكي!.. وجريت ع الشيزلونج اللي نسيت كوكي عليه وإحنا بنكشف ودورت مالقتش حاجة... بصت تحته مالقتش... بصت جنبه مالقتش!... دكتور هي الـ turtle فين؟... وقعدت تدور في باقي الأوضة والبنت بتعيط وتقول كوكي كوكي.. فأنا حسيت بأهمية كوكي بالنسبالمهم وكارثية الموضوع واستتجت إنها بتتباع بالواحدة مش بالكيلو أو بالـ «شوية» زي ما أنا كنت فاكر.. اللي هو الثلاثة بخمسين والسبعة بمية كدا يعني.. عشان كذا قمت أدور معاهم ف الأوضة.. بس للأسف مفيش فايذة خالص.. تحت المكتب وفوق المكتب.. في كل حتة مفيش... قولتلها ما يمكن جريت بره المستشفى، قالتلي جريت!! وبصتلي من فوق لتحت كدا.. المهم قلبنا الأوضة مفيش فايذة.

إنجاز علمى رهيب

- = فريق عمل مايكروسوفت: قمنا بإغلاق ثغرة خطيرة جداً بويندوز ١٠ .
- = فريق الصحة بمنظمة اليونسكو: قمنا بإمداد ١٣٠ قرية فقيرة حول العالم بمياه نقية خلال الثلاثة أيام الأخيرة .
- = فريق البحث العلمى بجامعة هارفارد: اكتشفنا علاج حاسم لمرض الزهايمر .
- = فريق هندسة الفضاء بوكالة ناسا: قريباً سنطلق مكوك فضاء جديد بإمكانه تجاوز حدود المجرة .
- = مس منال مديرة فريق الجودة فى المستشفى النهاردة: إحنا عملنا تسطيرة جديدة للورقة اللي بتكتبوا فيها العلاج يا دكتور .



طبعاً أنا قولت لها إيه دا ألف ألف مبروك يا مس منال.. ربنا
يوسع عليكو يا رب.. أنا رايح أمرع الحالات بقى عاوزة حاجة؟..
وماستنتش ترد تقولي عاوزة ولا لأ.. مشيت وسبيتها علطول.

الصراحة مبجش كلامها ولا كلام بتوع الجودة «الظاهرية»
دول.. كلامها بالنسبالي زي كلام الأستاذ معتز الدمرداش بالظبط..
مبجش اسمعه.. بيرفعلي الضغط.. ويرفع لضيوفه الضغط ويرفع
لناس عايشة في كواكب تانية خالص الضغط.

يعني مثلاً أخر حاجة سمعتها كان حلقة مستضيف فيها
الكابتن شادي محمد كابتن النادي الأهلي السابق.. وخلى
شادي محمد بيتكلم كلام مهم في نهاية الحلقة وقام مقاطعه فجأة
وقاله:(علفكرة يا شادي أنا عايزك تتابع حلقة بكرة مهمة أوي..
عن عمليات الإجهاض)!!.. اللي هو دا المفروض تنويه ذكي منه
عن الحلقة بتاعت بكرة.. بس جه يعمل تنويه ذكي راح مهزق
شادي محمد من غير ما يقصد.. أهو بردو مس منال زيه كدا..
بتيجي تعمل جودة بتتحرق منها ف الفرن.

مش معقول جودة الصبح كدا يا مس منال، الناس لسه مفطرتش

كتبتلك العلاج ف التسطيرة الجديدة يا حسن.. ربنا يجعل فيها

الشفاف

Wonder

بعد واحدة من أيام الشغل المتعبة قررت أنا وأصحابي الي كانو معايا في النبطشية إننا ننام شوية في سكن الأطباء وبعدين نخرج بليل نروح سينما.. المهم خرجنا وروحنا عند السينما.. وبلا فخر فضلنا ساعة إلا ربع بنختار ندخل أنهو فيلم.. وفي الآخر لعبنا ملك وكتابة على الفيلم الي هندخله.. ووقع الاختيار على فيلم wonder ... ودا الحقيقة من حسن حظنا جدا!!!!!!

الفيلم بجد عبقرى جدا!!!!!!.. يوصل رسالة مهمة وإنسانية وفي نفس الوقت بطريقة مبهجة مش كئيبة.. هو يحكي عن طفل مصاب بمرض جيني ومتلازمة مرضية منذ الولادة خلته يتولد مشوه الوجه.. خضع بسببها لـ ٢٧ عملية بس بردو كان شكله بالنسبة لزمائله الصغيرين في المدرسة غريب ومعظمهم كانو بيخافو منه.. الفيلم بقى بيتناول الموضوع دا.. وقضية التمر بين الأطفال اتناقشت فيه بشكل مختلف وجميل.

المهم الفيلم فكرني بسنة تانية ابتدائي كان عندنا فالفصل طفل كل الفصل كان بيعامله وحش.. هو مكنش عنده الحالة اللي عند بطل الفيلم.. هو كان كل مشكلته إنه استغفر الله العظيم ربنا يعافينا شعره أصفر زي الأجانب وعينيه خضرا.. وكان متدلح سيكا.. فكل الفصل بقى ماكنوش بيعبوه مش عارف عشان هو كان أحلى منهم ولا إيه المبرر.. المهم كانوا دايمًا يعايروه ويقولوله «يا أجنبي».. واللي كان بيزفه وهو مروح بلهجة ثورية حماسية: «يا انجليزي يا جبان... هنعطفك باللبان»... ومعرفش بردو إيه الشر فأنه يحدفه بلبان!!

وفيه واحد روش كان يقوله «يا واد يا حلو» على أساس إن كدا بيشتمه يعني .

المهم أنا بقى الواد صعب عليا جداً وقررت احتويه وأقعهه جنبي وأصاحبه وماكتش بقوله «يا انجليزي» ولا عمري حسسته إنه أقل مني يعني عشان شعره أصفر وعينيه خضرا والحاجات المقرفة اللي هو فيها دي.. وكنت كمان بشرّبه مالزممية بتاعتي عادي لو عطش.. مش من بؤها طبعاً.. كنت بصبله شوية مية فالغطا الصغير بتاع الزمامية كدا.

المهم فضلنا أصحاب بقى... لحد ما دخلت مرة في الفسحة في يوم لقيته قاعد فالفصل لوحده وبيقفل السوستة بتاعتي شنطتي... طبعاً الموقف دا فالابتدائي ومع خيالنا الواسع أيامها.. علطول

وبعدھا بفترة جه يصالحني فاتصاحت معاه بقى بعد ما قولتله
«هصالحك بس بشرط ... هفتح سوستة شنطتك وأقفلها زي ما
أنت عملت فبتاعتي أه»... فقالي ماشي ورجعنا أصحاب تاني
وحكالي إن العيال بقت بتقوله «يا إسرائيلى» فقولتله سيبك منهم
دول سفلة.

فأنا شايف فيلم wonder دا لازم يفرجوه للأطفال يتعلموا منه
إزاي يحترموا اختلاف بعض ... لأن الفكرة مش في مرض أو خلل
جينى أد ما هي الفكرة إن المجتمع دا إما بيحاول يتجنب الأنسان
المختلف.. يعنى الفيلم دا لو كنا شفناه في الابتدائى كان هيغير
مفاهيم كثيرة أوي عند الواحد أيامها أحسن مليون مرة من قصة
«سعفان الكسلان» المؤثرة بتاعت تالته ابتدائى وقتها.

كل الطرق تؤدي إلى جلطة

بينما الطيور تغرد في الغروب مودعة الشمس الذهبية التي تشق طريقها نحو الديار وغصون الأشجار تهتز بنسمات الهواء العليلة التي تسبق برودة الليل كنت أنا وقتها كالعادة مرمي في المستشفى في الطوارئ ٢٤ ساعة زى سيدة في مسلسل «نحن لانزرع الشوك» وواقف على باب أوضة العظام عمال ادعي ربنا يعدي النبطشية على خير، عشان بجد أنا مش قادر التحرك من نبطشية أول امبارح الصعبة.

طبعاً أنا معايا في النبطشية الدكتور حمادة سعد، ودا كان بيخليني ادعي أكثر إن ربنا يستر، لأنه أولاً لسه مايفهمش أي حاجة في العظام وميعرفش الـ distal radius من كوز الدرّة، يعني لا يعتمد عليه.. مقدرش اسيبه لوحده.. ثانياً بقى.. حمادة سعد ما ييهمدش في مكانه.. يعني دلوقتي مثلاً أهو عمال يتمشى في الطرقة عمال يكلم بنات في موبايله كعاداته في كل نبطشياته.

المهم بعد الدعا الي دعيتة فجأة لقيت واحد جاي من أول
طريقة المستشفى بيزق ترولى (السيرير الي بعجل الي بيتزق داف
المستشفيات) عليه واحدة ست بقوة وعنف ولهفة تجاهي .. وأول
ما وصل عندي قالي حضرتك دكتور العظام؟.. قولتله أيوة ..قالي
مراقي وقعت من على السلم مش قادرة تحرك رجليها.. بصيت
عليها وكتبتلها أشعة وقولت لجوزها خدها اعملها أشعة في غرفة
الأشعة الي في آخر الطريقة هناك.

ف بلهفة وعنف بردوزي ما جه طار بالترولي لغرفة الأشعة
وهو في سكتة أحدث الله أمراً سعيداً للغاية لي.. الراجل وهو بيزق
الترولي خبط من غير ما يقصد حرف الترولي في مؤخرة حمادة سعد
وهو عمال يتمشى في الطريقة يتكلم في الموبايل بمرقعة.. ساعتها
حمادة سعد قعد يزعق مع الراجل وهو موجوع وحاطط إيده على
منطقته والراجل بيعتذرله بخجل أنا أسف يا دكتور لا مؤاخذة
ماخدتش بالي.

طبعاً أنا أول ما شوفت حمادة سعد بيتخايق جريت بسرعة من
مكاني لأنني عارف عصيبة حمادة سعد.. والحمد لله فضيت الخناقة
قبل ما تكبر وحمادة سعد يطلع الهاند فري الـpurple بتاعته من
جيبه ويضرب بيها الراجل ويرتكب جريمة ... وبعدين جبت
حمادة سعد هديته وحطته المكعبات والعربيات والـpuzzle في أوضة
الجبس عشان يلعب بيها وميخرجش للطريقة يتشاقى تاني في الطريق
ويعور نفسه.

والحمد لله مرات الراجل طلعت سليمة مفيهاش كسور ولا حاجة وكانو شوية تمزق في الأربطة وكتبتلها علاج ومشيتها.. والنبطشية فضلت مكملة عادي والدنيا حلوة وهادية لحد ما حصل موقف من أفقع المواقف اللي اتعرضتلها في حياتي.. موقف ممكن يسبب بسهولة جدا جلطة لأي دكتور...

الموقف:

* حادثة كبيرة جداً وشاب اسمه «عبد الله» رجليه مكسورة ومحتاج عملية *

* عملنالو الإسعافات الأولية وعرفت أهله حالته وفهمتهم إنه محتاج عملية وهنحجزه في المستشفى وقالولي احجزه *
بعد عشر دقائق:

= سلامو عليكو يا دكتور.. أنا رضوان عم المريض عبد الله اللي هتعملوله عملية

- اهلا بيك يا حاج متقلقش خير إن شـ


= أنا علطول كعب رجلي بيوجعني يا دكتور.. دي أملاح دي بقى ولا إيه؟

هتشللش

هاتولي الجباية من على حمادة سعد بسرعة

الدكتور أحمد هارون

بمناسبة الجلطات.. المرادي الجلطة بسبب الفنان
أحمد هارون...



الأستاذ أحمد هارون في فيلم (٩٠ دقيقة) كان طالع بدور دكتور
تجميل كبير جاي من جامعة كاليفورنيا.. المهم الفنانة زينة عملت
حادثة ووشها باظ.. راح طالبها أشعة على وشها (مفيش حاجة
في العالم اسمها كدا ومايبينش فيها أي حاجة زي ما إنتو شايفين
..عبارة عن دايرة بيضا بتمثل عضم الجمجمة وخلاص.. يعني
محدث بيستفيد منها أي حاجة) ... المهم هو طلبها وبص عليها في
عمق مع الدكتور الثاني.. وراح مشاور بصباغه على المنطقة السودا
الي في الأشعة.. الي هي أصلاً مش ف الجسم أصلاً.. دا الهوا بتاع
الغلاف الجوي الي حولينا عادي.. وقاله بكل ثقة وحسم: (مخبش
عليك يا دكتور نبيل.. هي محتاجة لمجموعة عمليات دقيقة).

شكرا دكتور فاتيكا ما نتحرمش منك ♥

الحرب العالمية الرابعة

في إسبوع كدا فجأة قامت حرب كوميدية شرسة في المستشفى
عندنا ما بين قسم العظام (الي أنا واحد منه) وفريق الجودة..

أنا هحكي لكو القصة من الأول خالص.. أول ما استلمت في
المستشفى من حوالي سنة كدا... فريق الجودة عدى عليا وقالي لازم
تعمل ID... الي هو الكارنيه الي بنعلقه في رقتنا بشرطة زرقا زي
منظمي الحفلات دا.. المهم قولتلهم حاضر.. قالولي اطلعنا المكتب
وأنت مروح وهاتلنا صورة شخصية ليك وإحنا هنعملهولك..
قولتلهم والله تبغو خدمتوني.

وطلعتلهم مكتبهم وأنا مروح واديتلهم صورة وكاتب عليها
بياناتي... قالولي تمام... هات بقى ٢٥ جنيه تمن الـ id... قمت
مطلع ٣٠ جنيه.. قالولي مش معانا فكة دلوقتي قولتلهم مش
مشكلة يعني... قالولي يقالك خمسة يا دكتور إحنا هنكتبها
وهتاخذها وأنت بتستلمه... قولتلهم والله ما فارقة دي خمسة جنيه
يعني صباح الفل.

ومشيت وبعد كام يوم روحت خدت الid وقبل مامشي قالولي هات خمسة وخذ عشرة يا دكتور أنت باقيلك خمسة ... قولتلهم يا جماعة إنتو شاغلين بالكو كدا ليه ... أنا والله ما عاوزها... بصو أنا متبرع بيها لتطوير المستشفى .. أو اقولكو... هاتو بيها حاجة حلوة للعاملين بالمستشفى بمناسبة إني جيت... دي أقل حاجة والله أقدر اقدمها لكو.. بحبكو سلام.

ومشيت والدنيا كانت ما بينا طول السنة دي زي السمينة على العسل ... لحد الأسبوع اللي فات ... أحد أعضاء فريق الجودة دخل لرئيس القسم بتاعنا وهو شغال في العمليات من غير ما يستأذن منه واتكلم معاه بصورة غير لائقة... فرئيس القسم اتنرفز واتوتر وحصل شد ما بين الأثنين... مع إن المفروض الجراح وهو شغال محدش يحاول يكلمه في أي حاجة تانية لأنه مركز في العملية وحياة المريض مش لعبة.

فاتضايقوا إنه اتعصب عليهم والموضوع كبير.. يقومو يعملو إيه... راحو قالبين على قسم العظام بكل دكاترته واستقصدونا بقى... وعملوا تسطيرة جديدة لورقة العلاج زي منا حكيتلكو وبعدها بكام يوم عملوا اجتماع لينا لمناقشة التسطيرة الجديدة.. وكان عندنا عمليات كتيرة يومها فمخضرناش ... راحو مقدمين فينا ورقة بأننا ماسبناش العمليات وحضرننا المؤتمر العالمي للتسطيرة الجديدة اللي هما ابتكروها.

ودا غير أنهم كمان في خضام المعركة والحرب راحو مديني أنا
ودكتور صاحبي جزا يومين ... تخيلوا عشان إيه ... عشان مش
لابسين ال-ID ! ... في الوقت اللي فيه دكتور من قسم تاني محضرش
النبطشية الـ ٢٤ ساعة أصلاً ومجاش المستشفى ولقيته واخذ زينا
يومين جزا! ... قمة الجودة في العدل يعني بصراحة.

لأ ومدير فريق الجودة كل ما يقابل واحد من زمايلي يقولهم قولو
لأحمد عاطف اللي بيتريق على التسطيرة الجديدة للعلاج عالفيسبوك
إني جايله وفدماغى.

طبعاً أنا سمعت منهم الكلام دا اللي فيه لهجة تهديد واضحة
ليا واتعصبت جداً!!!! وقتها بجد ... فمن عصييتي روجت مطلع
ال-id بتاعي ومجمع كل الأيديهات اللي معاهم ولبستها.... عشان
أبقى فالسليم وقت ما يطب عليا.. أصل معلش يعني مش أنا اللي
اتهدد.

المهم ظبطنا حوار ال-ID لقينا حد من الجودة بيقول لواحد
زميلنا «لابس كروكس مخرم ليه؟» ... وهددوه إنهم هيكتبوا فيه
مذكرة لو الأخرام دي متقفلتش... آه والله مش بهزر... فأنا مش
عارف إحنا داخلين على إيه فالحرب الطاحنة دي والله!! أنا
حاسس إنهم بعد كدا هيتحكموا في لبسنا ومواعيد نومنا ونكلم
مين ومنكلمش مين و«المريض اللي بتجسه دا مش مسرح شعره
ليه يا دكتور أحمد» وحاجة منتهى التلكيك عشان يدونا جزا.

فأنا من خلال الكتاب دا بستغيث بالسيد الدكتور وزير الصحة
ورئيس الوزراء وأي حد يهه سلامة المنظومة الصحية في مصر...
فاكس للخناقة دي خالص... كدا كدا هتتحل إن شاء الله....
دلوقتي أنا عايز الخمسة جنيه بتاعتي.

نوتة حياتي يا عين

من العادات الي مش عارف كويسة ولا وحشة . إن علطول معايا نوتة صغيرة كدا دايمًا بحب أسجل وأكتب فيها الشكاوي العجيبة الي بتجيلي ك دكتور عظام في شغلي في المستشفى ... هتستغربوا إن دي بالنسبالي هواية .. حاجة كذا زي هواية جمع الطوابع ... أنا عمري ما فهمت ممارسي هواية دي أبدًا ... يعني ليه بيجمعوا الطوابع؟ ... بيعملوا بيها إيه؟ ... بيستفادو إيه طيب! ... عمري ما لقيت جواب ... أهو أنا كدا بردو بالنسبة لجمع الشكاوي العجيبة في النوتة ... عموماً مش هرغي كتير وإنتمو مش غُرب ... دي عينة بسيطة جداً من الشكاوي والطلبات العجيبة في النوتة من المرضى على مدار سنتين في تخصص العظام :

= صوابع أيدي طويلة

= لما بزق كثير بطن رجلي بيوجعني ** واحدة ست طبعاً **

= اكتبلي مطوّلات تطولني ثلاثة سنتي في شهرين عشان أعرف
أقدم حربية

= فيه وجع مش محسوس في ركبتي اليمين
= إيه أأمن مكان لضرب الأطفال يا دكتور من فضلك؟ ** أم
عندها حوالي ٣٠ سنة **

= اكتبلي المرهم دا اللي طعمه زي الفول السوداني
** طعمه !!!!!!!!!!!!!!!!!!!!!!! **

= أنا حاسس إن الحتة دي فاضية مفيهاش حاجة ** بيشاور
على منطقة الرسغ الأيمن ولا يعاني من وجع أو ألم أو تنميل
كل شكوته إنه حاسس إن الحتة دي فاضية الجسم بتاعه مش
مستغلها **

= هو الكسر ممكن يسببها ترجيع يا دكتور؟ ... - أيوة ممكن
من الوجع .. = طب هي دلوقتي مرجعتش، عادي؟ ** زوج
مصطحبا أنشاه المصابة بكسر في الساعد **

= صوباع رجلي الثاني أقصر من الصوباع الكبير الأولاني
= بتعملو عمليات مظراب؟ إيه المظراب دا! مظراب
يا دكتور مش عارفه! لا مش عارفه يا دكتور مظراب
طبي! ... مظراب طبي إزاي يعني! ** بعد شرح طويل فهمت إن
قصده عملية منظار **

= دكتور أنا جعان هتخلصوا إمتى؟ ** مريض متخدر نصفي
في وسط عملية شرايح ومسامير صعبة بنعملهاله ف رجليه **

= دكتور هو لو دهنت مرهم ع الجبس، الجبس هيتشربه ويوصل
لأيدي ولا أخذ أقراص وخلاص؟

= ما تعرفش دكتور عظام كويس أحسن من اللي هنا نروح
نجبس عنده؟ ** والد طفلة موجهها السؤال لي بعد ما قمت
بالكشف على الطفلة وعمل أشعة لها وأخبرته إن بها كسر بسيط
ويحتاج لعمل جبس **

= ألحق يا دكتور.. محسن جاتله زغطة ٣ مرات ورا بعض **
مرافق لـ مريض طالبا مني أسيب حالات الطوارئ اللي ف أيدي
واتجه بسرعة لـ نجدة محسن «اللي محجوز في المستشفى لعمل عملية
تثبيت لكسر بـ الإبهام الأيسر» عشان جاتله زغطة! **

= عايزة حل لأبني يا دكتور، أنا عملت أشاعات وتحاليل
كتيرة وكلها طبيعية، أبني كل ما يقع منع السلم أو من مكان
عالي بيتكسر أو بيتعور ** أم مصرية من الأكيد أنها معجبة بشدة
بسلسلة أفلام سبايدر مان وأكس من و deadpool **

= حسبي الله ونعم الوكيل فيها ** دعاء زوج أصيب ب شرخ
في اليد نتيجة ضربه لزوجته في وجهها **

المسطول

في إحدى النبطشيات حصل موقف معايا عجيب جداً ...
بليل كدا وأنا قاعد في الحمام بتاع الدكاترة اللي في الدور اللي
تحت السكن بتاعنا في المستشفى ... لقيت خطوات واحد ماشي
في الطريقة وفجأة الخطوات جت وقفت قدام الباب بتاع الحمام
وفضل واقف من غير ما يعمل أي حاجة .. أنا ابتديت أقلق ..
دقيقة ولقيت الشخص اللي كان واقف قدام الباب دا بيخبط ...
فأنا قولت «أيوه» عشان يعرف إن فيه حد في الحمام ... لقيته قعد
يحاول يفتح الأوكرة بتاعت الباب ويقول (حد محبوس جوه
الأصانير!!)

فأنا قولت إيه الغبي دا !! ... هو فيه أسانسير بأوكرة من بره! ...
الراجل دا مغيب ولا إيه ! ... قومت مزعق وقايل (دا هماaaaaaaaaaaaaaaام) ..
فالراجل سكت وبطل لعب في الأوكرة بس فضل واقف بردو
قدام الباب متحركش ! ... أنا قولت دا عاوز إيه دا بالظبط !

المهم خلصت بسرعة وغسلت إيدي وفتحت الباب ... أول ما فتحت لقيت راجل شكله مريب جداً وكان باين عليه إنه مسطول خالص مش في وعيه وعينيه حمرا كدا ولسانه كان ثقيل .. اللي هو كل أعراض إنه شارب حاجة منطبقة عليه ... المهم أول ما طلعت لقيته عاوز يدخل .. فبقوله (أنت رايح فين!) ... عشان دا الحمام بتاع الدكاترة وبمفتاح ... دا داخل يعمل إيه!

لقيته مردش عليا وكأنه مش سامعني أو سامع ومش مستوعبني بسبب اللي شاربه ... فكررت عليه السؤال بصوت أعلى ... قولتله (أنت مين ورايح فين !!!) ... فقالي بكل عنف بلهفته البطيئة الثقيلة المتلثمة اللي شاربة حاجة: (ملكش فيه يا زميلي... انجز نزلني فوق) ... أنا سمعت نزلني فوق دي وقولت لا كدا كتير لازم أبلغ الأمن ... فقولتله خليك هنا دقيقة وجايلك ... لقيته بقا أعنف وبيقولي: (لا بقولك إيه رايح فين نزلني الأول يا زميل).

طبعاً أنا فهمت إنه فاكرني أنا العامل بتاع الاسانسير لمجرد انه شافني بالاسكراب الكحلي طالع من الحمام اللي هو فاكره أسانسير .. بس أنا كنت فعلاً استفزيت منه واتضايقت من طريقته في الكلام معايا اللي فيها عدم احترام مش شغال عند أهله أنا ... إيه نزلني الأول وزميل دي! ... بس بصراحة شغلي سنتين في المستشفى دي وأحتكاكي بعدد كبير من الأشباح

اللي زيه خلاني لما حد يستفزني بالطريقة دي ماستخدمش القوة ... استخدم العقل.. أولاً عشان استخدام العقل أفضل في كل حاجة... ثانياً عشان مانضربش.

المهم قررت أخده على هواه.. قمت فاتحله باب الحمام وقولتله اتفضل ادخل ... ومرضتش اشغل النور عشان مايشوفش الكبانيه... وقولتله معلش النور قاطع جوه الاسانسير ادخل وأنا هظبطهولك من بره ينزلك.. ولما لقيته اقتنع إن الأسانسير مفيهوش نور وهيشغل عادي داشجعني أكمل المزاولة.

راح داخل فأنا قولتله عايز الدور الكام؟... قعد يفكر ومش داري هو رايح فين أصلاً... فقولتله الدور الثاني كويس؟... قالى آه... روجت قافل عليه الباب دقيقة واستنيت بره وقفت شوية جنب الباب وروجت فاتحله الباب تاني... لقيته خارج من الحمام عادي مبسوط جداً وبيقولى سلامو عليكو ولا كأنه عارفني ولا فاكرني ورجع من الطرقة اللي هو جه منها بمنتهى البساطة.

بس ونزلت بعدها أنا للأمن بقى أبلغ عنه فطلعوا جابوه ونزلوه... ف الصبح بقى بسألهم وأنا إحساسي كان عامل زي مدام نادية الجندي وهي بتكلم بتناكة في آخر الفيلم بعد ما سلمت الميكروفيلم للمخابرات المصرية وبقولهم (ها عملتوا إيه مع الواد اللي قولتلكوا عليه بليل؟)... فواحد منهم قالي وهو

متحمس جداً: (جيبه طلع مليان حشيش وترامادول).. فقولتلته:
المهم عملتو فيه إيه؟ (قصدي طبعاً على المسطول)... فقالي بكل
فرحة: وزعنا الترامادول علينا بالعدل.

يا عزيزى لا تطهئن أبداً للبزاييز

وأنا داخل من باب المستشفى الصبح لقيت حاجة غريبة جداً.. لقيت مجموعة من العمال جابو سلام خشب في مدخل المستشفى وبمتهى الحماس والجدية طلخوا عليها مسكوا البزاييز المدببة لسور المستشفى الحديد دهنوها كلها لون «فضي» وشالوا السلام ومشيو!.. آه والله.... تعبوا نفسهم وجابو سلام ودهان وشيء وشويات وهالمه وزامبليطا عشان يدهنوا طراطيف السور الحديد الأسود باللون الفضي وبعدين نزلوا خدوا السلام ومشيو!!

أنا مفهمتمش عملوا كداليه... دا شياكة يعني وكدا ولا بتوع الجودة هما اللي اقترحوا الحوار دا إن حديد السور مينفعش كله يبقى إسود ولازم البزاييز تبقى فضية وإلا تبقى مستشفى أي كلام.. بس كدا أو كدا الموضوع دا حز في نفسيتي جداً وخلاي هالين عليا أدمع.. بقى يدهنوا الحاجات دي وسايين شطاف حمام السكن بتاعنا بايظ بقاله أكثر من سنتين!.... والله حرام!!!!!! طب ادهنولنا الشطاف فضي طيب؟

بس اندهاشى دا راح لما عرفت بعدها بيومين عملوا كداليه... عشان الوزير أتاريه كان جاي يزورنا تاني.. بس المرادي عشان يأشر

رسميا على تحويل المستشفى بتاعتنا لمركز أورام متخصص.. ودا كان يوم حزين على الجميع وقتها.. أصل بقى مطلوب مننا نسيب المستشفى اللي بقالنا سنتين فيها ونروح أي مستشفى تاني بقى عشان مبقاش لينا خلاص مكان فيها.. هيقى كلها دكاترة أورام وبس.

عشان كدا اضطريت بعد سنتين قضيتهم في المستشفى في القاهرة إنسى أرجع بقى لمحافظة الأم تاني محافظة الغربية واشتغل في أي مستشفى فيها بقى.. وخلصت ورق تغيير مكان شغلي من القاهرة للغربية وروحت بعدها ودعت أصدقائي اللي كانوا في نفس الوقت بردو بيخلصوا ورق نقلهم من المستشفى لمستشفيات تانية قرروا يشدوا الرحال إليها مضطرين زيي.

كل مجموعة منهم اتجمعوا وراحو مستشفى معينة ماعدا شاكر... كان كل ما يسأل حد أنت رايح مستشفى إيه... يقوله رايح مستشفى وحشة جداً وزبالة مأنصحكش تيجي معايا... لدرجة إنه صعب عليا جدا عشان كدا لما سألني وقالي: «أنت رايح مستشفى إيه يا عاطف؟ لو حلوة أجي معاك، أصلي مختار أروح مستشفى إيه».. قولتله «رايح مستشفى في حلوان اسمها مستشفى ١٥ مايو.. حلوة جداً ياريت تيجي معايا فيها بجد».. قالي حلو خلاص هخلص ورقي وهقدم فيها معاك مدام حلوة.. قولتله دي جميلة جدا مش حلوة بس.

طبعاً دي ماكنتش المستشفى اللي أنا رايحها.. دي كانت المستشفى اللي خلص ورقه ليها حمادة سعد.. بعته شاكر... يكش يولعوا ف بعض الأثنين يارب.

استلم وأخلي

في رحلتي الممتعة لمديرية الصحة بمحافظة الغربية وأنا جايلهم بقى الورقة الي أنا معدل فيها مكان شغلى من القاهرة للغربية بعد ما المستشفى بتاعتنا التحولت أورام ... داخل لشئون العاملين ... لقيتهم كلهم ستات ... وقاعدين كل واحدة قدامها كوباية شاي بلين وعمالين يسأسأو فيها بسكوت بمتهى الملل وعدم الاستمتاع ... فقولتلهم سلامو عليكمو أنا جايب قرار تعديل نيابة وكنت عاوز اتوزع على مستشفى ... من قبل ما أقول كلمة مستشفى يدوب بقول (أتوز) ... ولسه هقول الـ (أع) ... لقيت واحدة بتقولي شوف الأوضة الي جنبنا.

روحت الأوضة الي جنبهم ... قالولي الأوضة الي قبلنا ... الي أنا لسة سائل فيها! ... فرجعتلهم قولتلهم بيقولولي الأوضة دي! ... قالولي وهما مش طايقيني: (طب استنى مدام رباب زمانها جاية) .. فوقفت جنب مكتبها الفاضي مستنيها ... وفضلت مستني

... لا هى بتيجي ولا الولية الي قدامي عارفة تصطاد البسكوتة الي باشت فالشاي بلبين.. لحد ما خدت بالي من موظفة لابسة بلوزة بيضا عليها قلوب حمرا وطرحه برتقاني ع الصبح كدا... فأنا قولت بااااس... الست دي شكلها متفائلة ومقبلة على الحياة الدنيا وهتفيدني... فسألتها قولتلها هو مدام رباب هتأخر؟... قامت بصالي من ورا البسكوتة الي حطاها فالشاي ومردتش... اخرجتني جداً... إلهي تشكّي ف كل القلوب الي على بلوزتك يا بعيدة.

المهم فضلت ملطوع فترة لحد ما جت مدام رباب... خدت مني الورق بطراطيف صوابعها كأنه ورق تواليت مثلاً وقالتلي أنت كنت واخذ تكليفك فالغريبة؟... قولتلها آه... قالتلي تمام... هتروح بقى الإدارة الصحية الي كنت تابع ليها فالتكليف تستلم وتخلي... وبعدين تروح الوحدة الصحية الي أنت كنت فيها في التكليف تستلم وتخلي وأنت واقف ف نفس الوقت... وبعدين تجيلي.

قولتلها وحدة صحية إيه!... أنا سايبها بقالي سنتين وأخليت منها من أول ما استلمت النيابة... هروح لها أعمل إيه!... وإيه استلم وأخلي ف نفس الوقت دي!... هبقى استفدت إيه يعني أو إنتوا هتستفادو إيه!... يعني مكان أنا مش فيه أروح استلم وأخلي منه ليه!... إيه الفكرة!!!... قالولي هو كدا النظام... وبصراحة حاولت ألاقي مبرر للحركة دي ملقتش غير إنهم بيحاولو يجربوني

يشوفوني شغال ولا لأ... اللي هو يا ترى الدكتور دا بيستلم ويخلي
بسرعة ولا بيعلق نلحق نرجعه لمديرية القاهرة.

المهم عملت اللي هما عاوزينه وروحت الإدارة والوحدة الصحية
الي كنت فيها من سنتين استلمت وأخليت في نفس ذات اللحظة
وسط اندهاش الناس هناك.. اللي هو إيه الهبل الي أنت فيه دا يا
دكتور!.. بتستلم ليه مدام هتخلي ف نفس الوقت!

بس ما علينا... ورجعت بقى تاني بعد دوامة سحلة طويلة
وفرهدة وإمضات استلام وإخلا ومشاور كتيرة للمديرية...
فدخلوني بقى للدكتورة المسئولة عن توزيع الدكاترة عالمستشفيات..
قالتلي عايز تروح فين؟

فقولتلها عندكو مستشفيات إيه حلوة هنا؟

قالتلي فيه «بسيون العام»... قولتلها طبعاً طبعاً بلد نجمنا
الكبير محمد صلاح.. بس لأ بعيدة.

قالتلي فيه «السنطة العام».. قولتلها طبعاً طبعاً بلد نجمنا الكبير
على جبر... بس لأ... مبحبوش.

قالتلي فيه «زفتى العام»... قولتلها طبعاً طبعاً... وحاولت
أفكر في حد أعرفه بيلعب منها ماعرفتش... فاضطريت أوافق.
فقالتي تمام... هتروح زفتى العام بس هنعملك انتداب ٣ شهور

مش مستشفى زفتى دي بردو يا خويا

روحت بقى إدارة زفتى عشان استلم وأخلي منها زي ما قالولي فالمديرية.. سألت على شئون العاملين قالولي في الدور السادس.. دورت على الأسانسير لقيته مش شغال! ... فاضطريت بقى أطلع على السلام.. وماشاء الله.. السلام كانت بتتغير مكانها مع تغير الأدوار.. الي هو أنت طلعت التالت.. طيب دور بقى ع السلم الي بيطلع الرابع فين يا شبح.. وهكذا..

دا غير إن الأدوار كلها شبه بعضها ومش مرقمين الأدوار وحاجة فلة.. لدرجة إني اندمجت في الطلوع لحد ما وصلت التامن.. قالولي أنزل دورين.. جيت أنزل الدورين اندمجت وأنا نازل وصلت الرابع.. بصو هو كان يوم منيل الحمد لله.

عموماً خلصت الاستلام في الإدارة والموظفة قالتلي روح بالورقة دي بقى على مستشفى زفتى العام استلم وأخلي بسرعة وتعالى عشان نخليك ونعملك الانتداب الـ ٣ شهور للسنتة.

روح مستشفى زفتى ... وصلت عندها لقيت كمية تكاتك مهولة قافلة مدخل المستشفى مفيش مكان أدخل منه.. اتصرفت.. دخلت جوه توكتوك منهم من بابہ اليمين.. طلعت من بابہ الشمال... لقيت توكتوك تاني... دخلت من بابہ اليمين طلعت مالشمال.... لقيت توكتوك تالت دخلت من بابہ اليمين طلعت من بابہ الشمال لقيتني جوه شئون العاملين.. أتاري التكاتك واصلة لحد جوة.

المهم لقيت أوضة واسعة مليانة موظفين.. كلهم كانوا مبسوطين إلا واحد بس.. كان مكشر وبياكل في حطة حلاوة مولد صغيرة قد كف رجله كدا.. فسبتهم كلهم وقمت رايجله.. أصلي بحب حلاوة المولد أوي... أقوله لو سمحت يا أستاذ أروح بالورقة دي لمين؟ ... يبصلي من فوق لتحت وهو مكشر ويكمل كتابة في الورق الي قدامه ومايردش.

فقولتله تاني.. طب الورقة دي بتخلص هنا ولا من حطة تانية؟... مايردش بردو! ... طب أنت زعلان مني ف حاجة؟ ... حد ضايقك طيب؟ ... حد داسلك على طرف؟ ... طب على إخلاء طرف؟ ... طب مالك!! ... السمسمة طعمها وحش طيب؟ ... طب أجبلك تشرب؟ ... طب إيه!! ... طب سلامو عليكمو!

وروح لموظفة تانية بشوشة شوية قولتله سلامو عليكمو لو سمحتي أنا جاي استلم أخلولي.. قالتلي إيه! ... قولتله أنا جاي

استلم أحلوي.. قالتلي هنخليك ليه!!!.. فأديتلها الورقة قولتلها
المديرية عملتلي انتداب ٣ شهور لمستشفى السنطة فهستلم وأخلي
من عندكم وأروحها... وبعد الـ ٣ شهور هرجعلكو تاني لو
لسه فاتحين.. قالتلي: (آه طيب روح بس قسم العظام يمضولك ع
الاستلام والإخلا وأنا اعملها لك)

روح قسم العظام.. سلامو عليكو إزيكو يا دكاترة أنا
المديرية جابتني زفتى بس عملوي انتداب ٣ شهور للسنطة..
فكنت عايز إمضا من القسم عشان أخلي.. قالولي لا السنطة
إيه وانتداب إيه.. إحنا محتاجين نواب.. أنت نبطشي معانا بكرة
الأحد.. قولتلهم «طب بالنسبة للانتداب بتاع السنطة الـ ٣ شهور
الي المديرية عملتهولي دا أطنشه عادي؟».. قالولي «والأثنين عندك
عيادة والتلات عمليات».

بس واستلمت الحمد لله في زفتى ومأخلتش.. وسط تساؤلين
كبيرين يدوران في ذهني حتى الآن.. الأول: إزاي الحوادث الي
بتجى المستشفى بتدخل من التكاتك الي واقفة دي.. والثاني: إزاي
حد بيكشر وهو يياكل حلاوة المولد في نفس الوقت عادي كدا!

نهاية وبداية

وزفتى كانت بداية لمغامرة ورحلة جديدة ليا في وزارة الصحة، السؤال بقى هل هكمل وأعمل كتاب جديد فيها ولا هعمل كارير شيفت وابدأ المشروع اللي طول عمري بحلم بيه، مشروع مزرعة بسلة متهرمنة، الفكرة دي محدش عملها في مصر قبل كدا ولا في أي حته، البسلاية الواحدة هخليها تبقى قد اليوستفنداية كدا، مشروع ربحه مضمون وأبقى ريحت نفسي من الطب ووجع دماغه وفي نفس الوقت ريحت ست البيت، بدل ما تقعد تفرط ف البسلة طول اليوم، هي بسلاية واحدة بالعدد تحطها ف الحلة وتقطع عليها جزر وشكر اااا... وبألف هنا يا ست الكل ♥

أحمد عاطف

الفهرس

- 13..... الجبيرة 1
- 17..... الجبيرة 2
- 21..... سكن الأطباء
- 25..... عيل قالع يا ولاد الحلال
- 29..... السياحة أدب
- 33..... الفلوس الحلال ما بتضعش
- 37..... مهمة مستحيلة
- 43..... إسعاف 55
- 47..... الرجل السويتش
- 51..... أنا يا بنتى!!
- 53..... حلم عجيب
- 57..... كفاياك مبار
- 61..... معلش
- 65..... عيد ميلاد هولأكو
- 69..... زراعة النخاع في غير موسم
- 73..... تنمية بشرية
- 75..... ما هي نقصاكي يا هبة
- 79..... الله يخربيتك يا سهير
- 83..... واوا

87	صراع ع النيل
93	كاس العالم
97	The Minions
101	المخترعين
107	عزى وأشجان
109	أجمال إحساس فى الكون
111	اللى جاي حمارة " حرفياً "
115	The shape of water
119	أوبن بوفيه
125	من الذى ثقب الازون ؟
129	فى دقيقتين ياخذ الكبد وياخذ العين
133	ياللى ع الترة حود ع الما
137	إنجاز علمى رهيب
139	Wonder
143	كل الطرق تؤدي إلى جلبة
147	الدكتور أحمد هارون
149	الحرب العالمية الرابعة
153	نوتة حياتى يا عين
157	المسطول
161	يا عزيزى لا تطمئن أبداً للجزاير
163	استلم وأخلي
167	مش مستشفى زفتى دي بردو يا خوبا
171	نهاية وبداية

